


# ҚҰДАЙДЫ ҚАЛАЙ ТАНЫП БІЛУГЕ БОЛАДЫ?



**К. Тэйлор**

Кеннет Тэйлор

**ҚҰДАЙДЫ ҚАЛАЙ ТАНЫП,  
БІЛУГЕ БОЛАДЫ?**



«ШЫҒЫС  
СӨУЛЕСІ»

УДК 2  
ББК 86 3  
Т 31

Кеннет Тейлор  
Құдайды қалай танып, білуге болады? – Алматы:  
ШЫҒЫС СӘУЛЕСІ, 2009 – 94 бет

ISBN 9965-896-09-7

Қазақ тіліне аударған “ШЫҒЫС СӘУЛЕСІ” баспасы

Өздеріңізге ұсынылып отырған бұл кітапты «Мәсіх жолын ұстанушылар ілімінің қысқаша кіріспесі» деп атауға болады. Мұнда Құтқарушымыз Иса Мәсіх туралы, сонымен қатар күнә, жұмақ, тозақ және т.б. тақырыптар жайлы сөз қозғалады.

УДК 2  
ББК 86 3

Т 0403000000  
00(05)-09

ISBN 9965-896-09-7

“ШЫҒЫС СӘУЛЕСІ”, 2009



Өздеріңізге ұсынылып отырған бұл кітап – Киелі кітап әңгімелерінің жинағы емес. Оны «Мәсіх жолын ұстанушылар ілімінің қысқаша кіріспесі» деп атауға болады. Мұнда Құтқарушымыз Иса Мәсіх туралы, сонымен қатар күнә, жұмақ, тозақ және тағы басқа көптеген тақырыптар жайлы сөз қозғалады.

Киелі кітап әңгімелері жайлы жазылған кітаптар аз емес, бірақ сонымен қатар, балалар біздің ұстанатын іліміміздің осы уақытқа дейін белгісіздеу болып келген негізімен таныс болуға тиіс.

Біздің балаларымыз Киелі кітаптың тамаша хикаяларын біліп қана қоймай, әр оқиганың мағынасын да түсінуі керек. Олар бұл оқиганың шыннайылығы мен оның өздері үшін қаншалықты маңызды екендігіне көздерін жеткізуі тиіс. Киелі кітап әңгімелері мен Киелі кітапты зерттеудің арасындағы осы өзара байланысты балаларға қысқа да қызықты етіп жеткізуге тырыстық.

Бала Киелі Жазбаны оқуды бастамас бұрын, оның бойында киелікітаптық шындықтардың іргетасы болуы тиіс, ол соның негізінде ғана оқығандарының мағынасын түсіне алады.

Мұндай дайындығы бар бала болашақта көптеген қауіпті азғырушылықтарға қарсы тұра алады. Бала Киелі кітап шындықтарын жастайынан дұрыс ұғына білсе – сенімді досына айналады.

Құдай Сөзі – бұл сенімді күш, мықты қорған. Бұл кітап балаларға осыны ұғындырады. Бұл кітапты отбасында күнделікті оқуды ұсынамыз. Оны балалармен сабақ өткізуге дайындыққа пайда-



лануға да болады. Спердженнің айтуынша, бұрын бұршақ екенде шұңқырға үш бұршақтан салыпты, бірі – жердегі құрт үшін, екіншісі – құс үшін, ал үшіншісі – жеміс беру үшін.

Құдай Сөзін балалар бойларына әбден сіңіріп, Киелі кітап шындығын естеріне сақтағанша біртіндеп үйрету қажет.

Әр әңгіменің соңындағы ұсынылып отырған мінәжаттар жеткіліксіз; әркімнің мінәжатты өз сөзімен айтуға мүмкіндігі болуы тиіс.

## 1. Бір ғана Құдай бар

Киелі кітапты оқымайтын және Құдай туралы өте аз білетін елдерде әлемде әр түрлі құдайлар бар деп сенеді. Олардың кейбірі – екі құдай, тағы біреулері – төрт құдай бар дегенге сенеді. Тіпті, жүздеген, мыңдаған құдай бар деп сенетін халықтар да бар. Ай мен күнді де құдай деп есептеп, оларға өз мұқтаждықтарын айтып жалбарынамындар да бар.

Ай мен күн бізге көмектесе ала ма? Әрине, көмектесе алмайды! Оларды Құдай жаратқан, сондықтан да олар құдай бола алмайды. Біз Құдайдың жаратқандарына емес, Оның Өзіне бас июге тиіспіз.

Періштелерге мінәжат етуге бола ма? Олар да құдай болып санала ма? Жоқ. Періштелер тіршілік иелері болып табылады. Біз оларды көре алмағанымызбен, олардың кейбірі біздің арамызда жүр. Бірақ, оларға табынуға болмайды! Періштелер – құдай емес, Құдайдың қызметшілері. Оларды Құдайдың Өзі жаратты. Олар Құдайды сүйеді және Оған қызмет етеді. Періштелердің көптігі сондай, біз олардың санын көз алдымызға елестете де алмаймыз.

Аспанда біздің сиынатын Құдайымыздан өзге де құдайлар бар ма? Бұл сұраққа төмендегі мысалды оқып шыққан соң өзің де жауап бере аласың.

Бір қауым қызметшісі Сәуледен оның Құдай туралы түсінігі қандай екенін білгісі келіп:

– Сәуле, әлемде неше Құдай бар? – деп сұрады.

– Біреу, – деп жауап берді.

– Оны сен қайдан білесің?

– Себебі, әлемде өзге құдайларға орын жоқ, – деп жауап берді кішкентай қыз – Біздің Құдайымыз бүкіл аспан мен жерді қамтып тұр.

Бұл өте жақсы жауап. Сондықтан біз Құдайды Оның жаратқандарының бәрінен артық сүюіміз керек.

**Оқу үшін:** Мысырдан шығу 20:1–6

**Сұрақтар:** Әлемде қанша Құдай бар?

Күн мен айға табынып жалбарынсақ, олар бізді ести ме?

Періштелерге табынуға бола ма?

**Мінәжат:** Аспандағы Әкеміз! Саған әлемдегі жалғыз Құдай екендігің үшін және Өзің жаратқанның бәрінен күшті болғаның үшін алғыс айтамын. Сені шын жүрегіммен сүйіп, тек Өзіңе ғана қызмет етуіме көмектес. Мен мұны Иса Мәсіхтің атынан өтінемін. Амин.

## 2. Құдай деген кім?

Құдай – Тұлға. Ол аспанда тұрады. Киелі кітапта айтылатын бұл аспан – біз күнде көріп жүрген, көгінде бұлттар қалықтап, ұшақтар ұшып жүрген кәдуілгі аспан емес. Құдай тұрған аспанды біз көре алмаймыз. Біз Құдай аспанда дегенімізбен, ол аспанның дәл қайда екенін білмейміз. Бірақ, оның ғажаптығын білеміз және бәріміздің сонда барғымыз келеді. Егер біз Құдайды танып, Оны сүйетін болсақ,



онда өлгеннен кейін Құдай мен Оның періштелері тұрған жерге барамыз.

Құдай – Рух екенін білесіңдер ме? Бұл оның денесіз Тұлға екенін білдіреді. Сенде де, мен де де рух өмір сүретін дене бар. Ал Құдайға дене қажет емес.

Ол жарық дүниедегі ең таңқаларлық тіршілік Иесі. Ол ешқашан қателеспейді. Құдайдың ұлылығы соншалық, Ол үшін мүмкін емес нәрсе жоқ. Ол Өзі қалағанның бәрін де жасай алады. Құдай бүкіл әлемді: аспан мен жерді, шөп пен ағаштарды, күнді, ай мен жұлдыздарды жаратты. Ол періштелерді жаратты, сені мен мені де жаратқан Сол. Көзге көрінетін және көрінбейтін нәрселердің бәрін бір Құдай жаратты. Ол күнді күркіретеді, найзағайды ойнатып, қар мен жаңбырды жаудырады.

Сонымен, Құдай қайда тұрады? Біз Оның аспанда екенін білдік. Бірақ, Ол осында, біздің арамызда да жүр және бізді естіп тұрады. Құдайдың бір мезгілде барлық жерде бола алатыны таңқаларлық нәрсе емес пе? Ол үлкен мұхиттардағы кемелердегі жолаушылармен бірге болады, сонымен бір мезгілде алыс елдердегі Ізгі хабар таратушыларды да қорғап жүреді. Біз тек бір орында ғана бола аламыз. Құдай болса, бір мезгілде барлық жерде бола алады.

Біз үшін ең маңыздысы – Құдай бізді сүйеді және сондықтан да біздің қамымызды ойлайды. Біздер де Құдайды сүйгендіктен, Оны ренжітетін қылықтар жасағымыз келмейді.

**Оқу үшін:** Ишая 6:1–8  
**Сұрақтар:** Құдайда дене бола ма?  
Дәл қазір Құдай қай жерде тұр? Тым болмағанда екі орынды атап берші.  
Құдай қараңғыда, түнде көре ала ма?

**Мінәжат:** Біздің ұлы Құдайымыз! Ұдайы біздің қамымызды ойлап жүретіндігің үшін Саған алғысымды айтамын. Амин.

### 3. Құдай қайдан пайда болған?

Құдай туралы естіген көп жайттарды түсіну – біз үшін қиын. Мысалы: Оның бір мезгілде барлық жерде бола алатынын алып қарайық. Мұны біз, тіпті, көз алдымызға да елестете алмаймыз. Құдай да оның сырын бізге айтқан жоқ. Бірақ, уақыты келіп, көкке барғанда бәрінің жауабын аламыз.

Құдай қайдан пайда болды? Оның әкесі мен шешесі болды ма? Жоқ, Құдайға әкенің де, шешенің де қажеті болған жоқ. Ол ешқашан туылған емес және көкте кішкентай бала болып өскен емес, себебі Ол әрдайым бар болды. Ол әрдайым ұлы болды және Ол қазіргі күні де ешқандай өзгерген жоқ.

Құдай сен және сенің ата-бабаң туылғаннан бұрын да бар болатын. Таулар да, ағаштар да, аңдар да әлі болмай тұрған кезде – Құдай болды. Әлемде мүлде ештеңе болмаған кезде-ақ Құдай бар болатын және Ол мәңгі бола береді.

Біз де мәңгі өмір сүреміз. Құдай бізді сол үшін жаратқан. Бірақ біз ұдайы жер бетінде өмір сүрмейміз. Күндердің күнінде біздің денеміз қартаяды да, жерді

тастап кетуге мәжбүр боламыз. Ал егер жер бетінде жүрген кезімізде Құдайды сүйген болсақ, онда біз көкке – Құдайдың жанына мәңгілік өмір сүруге бара аламыз.

Құдайды сүюдің орнына тек өздерін жақсы көретін ақылсыз адамдар жер бетінде аз емес. Олар өлген соң Құдай оларды көкке қабылдай алмайды. Олар мәңгі бақи қараңғы қапаста қалып, Құдайдан алыс өмір сүреді.

Біз мәңгілік өмір сүретін болғандықтан, жер бетіндегі өмірімізді дұрыс өткізуіміз қажет. Сендерге өзінің мәңгілік өмір сүруге тиіс екенін ұмытып кеткен бір бай адамның тарихын айтып берейін.

Оның егіні бітік шығып, мол өнім алады. Оның қамбасы астыққа толып қалады. Астығын қымбатқа сатып, байыған үстіне байи түсуді ойлаған ол бұған қатты қуанады.

«Бұл тамаша болды! – деді ол өзіне-өзі. – Енді маған жұмыс істеудің қажеті жоқ. Астық сатудан түскен ақшама не қаласам да сатып алуыма болады!»

Кешке ұйықтауға жатқан кезде оның бар ойы өзінің байлығының төңірегінде болды. Табысының бір бөлігін мұқтаждықта жүргендермен бөлісу туралы ой оның қаперіне де кірмеді.

Сол түні ол өліп қалды. Енді оның Құдай алдында есеп беруіне тура келді. Өзінің Құдайға қызмет етуге, кедейлер мен ауруларға қарасып тұруға тиіс болғанын ол енді есіне алды. Бірақ, тым кеш еді.

Сендердің ешқайсыларың әлгі адам секілді ақылсыз болмас деп үміттенемін!



**Оқу үшін:** Лұқа 12:16–28  
**Сұрақтар:** Құдайдың туылған күні бар ма?  
Ағаштар мен таулар әлі болмай тұрған кезде Құдай болды ма?  
Құдай қай уақыттан бері бар?  
Сен өлгеннен кейін қанша өмір сүресің?

**Мінәжат:** Көктегі Әкеміз! Мәңгі өмір бергенің үшін Саған алғысымды айтамын. Өзіңе ұнамды өмір сүруіме көмектес. Мұны мен Иса Мәсіхтің атынан сұраймын. Амин.

#### **4. Егер Құдайды көре алмасақ, Оның бар екенін қалай білеміз?**

Желді кім көре алады? Мен көре алмаймын, әрине, оны сен де көре алмайсың.

Біз желді көре алмағанымызбен, оның бар екенін білеміз. Желдің соққанын басымыздағы шашымыздың желбірегенінен, тербетілген шөп пен сыбдырлаған бұталардан білеміз. Ал желдің өзін ешкім, ешқашан көрген емес.

Сол сияқты, Құдайды да көре алмаймыз. Бірақ, біз Оның шынымен бар екенін біле аламыз. Мұны біз Оның істеген істері арқылы білеміз.

Құдайдың бар екенін дәлелдейтін, Ол атқарған бірнеше істі айтып бере аласың ба?

Мысалы, жұлдыздарды, айды, күнді алайық. Олар аспанға өз беттерімен орналасты ма? Әрине, жоқ! Оларды біреу сонда орналастырды ғой. Үйді көргенде, сен оны жерден өсіп шықты деп

ойламайсың ғой. Оны біреулердің салғанын білесің. Аспаннан сансыз көп жұлдыздарды көргенде, біз олардың да онда өздігінен тұрмағанын білеміз. Оларды сол жерге біреу орналастырды. Сол «біреу» деп отырғанымыз – Жаратушы Құдай Ие.

Құдайды неліктен көре алмайтынымызды білесің бе? Оның кереметтігі мен ғажаптығы сонша, біз Оны көрген бетте өліп кетер едік. Егер біз Оның айтқандарын мүлтіксіз орындайтын болсақ, күндердің күнінде Ол бізді Өзіне, көкке әкетеді де, сол жерде біз Құдайды Өз даңқында көреміз.

Қазір біз Құдайды көрмесек те, Оның бар екеніне сене аламыз және Оны сүйе аламыз. Киелі кітап бізге Құдай туралы, Оның бізге, адамдарға деген сүйіспеншілігі мен мейірімі жайлы айтады. Құдайды сүю үшін, Оның Өзін көру міндетті емес.

Бірде бір әйел қызына Құдайды жақсы көруі керектігін айтады. Сонда қызы:

– Анашым, мен Құдайды бірде-бір рет көрмесем, қалай Оны жақсы көремін? – деп жауап береді.

Арада бірнеше күн өткенде әлгі қыз өзі өмірі көрмеген туыс апайынан пошта арқылы сыйлық алады. Қорапты жайлап ашқан қыз оның ішінде жатқан суреттері бар әдемі кітапшаны көреді. Ол кітапты қызықтай парақтап, әбден қарап шыққан соң шешесіне жүгіріп келіп:

– Анашым, мынау қандай керемет кітап! Мұны жіберген апайым неткен тамаша адам? – дейді.

– Бірақ, сен оны бір рет те көрген жоқсың ғой!

– Оның рас, – деп жауап берді қыз. – Бірақ, мен оның жақсы адам екенін сеземін. Мұндай тамаша кітапты тек жақсы адам ғана жібереді!

Біз де солай, Құдайды ешқашан көрмесек те, Оны жақсы көре аламыз. Ол бізге көптеген тамаша нәрселерді: үйімізді, ата-анамызды және басқа да көптеген игіліктерді сыйға тартты. Сондықтан біз Құдайдың Өзін әлі көре алмасақ та, Оны жақсы көруге және Оның біз үшін істегендеріне риза болуға тиіспіз.

**Оқу үшін:** Жар. баст. 1:14–28

**Сұрақтар:** Сен желді көре аласың ба? Оның бар екенін қайдан білесің?

Сен Құдайды көре аласың ба? Оның бар екенін қайдан білесің? Бірнеше мысал келтір.

Біз Құдайды неліктен қазірше көре алмаймыз?

**Мінәжат:** Жаратушы Ие! Көрсеткен құдіреттерің арқылы Сенің бар екеніңді білемін. Самсаған жұлдыздар, күн мен ай – бәрі Сенің құдіретіңді білдіреді. Күндердің күнінде Өзіңнің қандай екеніңді көретінім үшін алғысымды айтамын. Аумин.

## 5. Әке Құдай, Ұл Құдай және Киелі Рух Құдай

Біз дүниеде тек бір Құдайдың ғана бар екенін білеміз. Келесі айтатынымызды түсіндіру өте қиын болғандықтан, енді аса мұқият болуымыз керек. Бұл тақырып Киелі Жазбадағы ең маңызды тақырыптардың бірі болып табылады.

Біздің Аспандағы Әкеміз – Құдай. Ал енді сендер



Иса Мәсіхтің де Құдай екенін білуші ме едіңдер? Сондай-ақ, Киелі Рух та – Құдай. Олардың үшеуі де Құдай. Бірақ, бұл үш Құдай бар дегенді білдірмейді. Біздің Жаратушымыз – үшбірліктен тұратын Құдай.

Бұл үш Тұлға: Әкесі, Ұлы және Киелі Рух – қалайша бір Құдай саналады? Мүмкін, Иса – мәңгілік Құдайдың басқа аты шығар? Жоқ! Әкесі, Ұлы және Киелі Рух – бір Құдайдың әр түрлі аты ғана емес. Былайша айтқанда, Құдайдың әр түрлі міндеттері бар. Аспан мен жерді Әке Құдай мен Ұл Құдай жаратты. Иса былай дейді: «Мен және Әкем – біртұтас».

Иса қайта тірілген соң, Әке Құдайдың жанынан орын алу үшін аспанға қайтып оралды. Ол бізге Құдай болып саналатын Киелі Рухты жіберді. Бұл Киелі Рух Иса Мәсіхті қабылдаған адамдардың бойына қонады.

Осылай болғанмен де, тек бір ғана Құдай бар. Енді осы үш Тұлғаның қалайша бір Құдай болатынын көз алдымызға елестетіп көрейік. Жоңышқаның жапырағына қара. Оның үш жапырақшасы болса да, бір жапырақ болып есептеледі. Немесе суды алайық. Әдетте ол сұйық күйінде болады. Қатты суық болған кезде ол қатып, мұзға айналады, ал қатты қызса – буға айналып кетеді. Әйтсе де, судың да, мұздың да және будың да құрамдары бірдей. Бұл мысалдар біздің Құдайлық «үшбірлікті» түсінуімізге көмектеседі, дегенмен, оны біз аспанға барғанда ғана толықтай түсіне аламыз.

Мұны білу біз үшін өте маңызды, себебі, көптеген адамдар Исаның – Құдай екеніне сенбейді. Егер Ол Құдай болмаса, онда Ол біздің Құтқарушымыз да бола алмас еді.

Егер де үшбірлік туралы ілімді толық түсіне алмасаңдар, оған қынжылмаңдар. Сендер оған қарамастан Құдайға сеніп, Оның еркін орындай аласыңдар.

**Оқу үшін:** Марқа 1:9–11; Жохан 16:7–15

**Сұрақтар:** Біз бір Құдайға ма, әлде, бірнеше құдайға сиынамыз ба?

Құдай Иеміз үш Тұлғадан тұрады. Оларды атап бере аласың ба?

**Мінәжат:** Ұлы Құдай – көктегі Әкеміз! Мен Сенің құдіретіңді толықтай түсіне алмаймын. Бірақ мені сүйетінің үшін Саған алғысымды айтамын. Өзіңді бұдан да әрі жақсы көруіме, құрметтеуіме көмектес. Мен мұны Иса Мәсіхтің атынан сұраймын. Амин.

## 6. Құдай адамды не үшін жаратты?

Құдай бізді не үшін жаратты және біз не үшін өмір сүреміз?

Құдай бізді Өзін жақсы көріп, құрметтеуіміз үшін жаратты. Біздің Құдайымыз – ұлы және шапағаты мол Құдай, сондықтан Ол бізден Өзіне риза болып, қуануымызды күтеді. Сонымен қатар, Ол Өзінің бізге деген ұлы сүйіспеншілігі туралы ойланғанымызды қалайды. Осы сүйіспеншілігін Ол біздің күнәларымыз үшін жаза тартқан Өзінің Ұлы Иса Мәсіхті осы әлемге жіберу арқылы көрсетті. Оның балалары бола алатындығымыз үшін біз Оған шын жүректен риза болуға тиіспіз. Бұған қоса, Құдай бізден маңайымыздағы адамдарды да жақсы көргенімізді

күтеді. Құдай бізді жақсы көрді, бұл біздің өзгелерді жақсы көруімізге күш береді.

Құдайдың адамды не үшін жаратқанын енді түсіндіңдер ме? Ол бізге қажеттінің бәрін берді. Енді біз Құдайды мадақтай аламыз. Оны жақсы көріп, Оның еркін орындай аламыз.

Ал сен Оны жақсы көресің бе? Ол осы өмірді саған сол үшін берді.

Мен Құдайды өте жақсы көрген бір адам туралы әңгіме естідім. Мұның Оған ұнамды екенін білетін әлгі адам Құдай туралы әндер айтатын. Кейбіреулер оған: «Сенің дауысың жаман ғой, одан да айтпай-ақ қойсаңшы», – дейді. Сонда ол: «Менің көктегі Әкем дауысым қарғаның дауысынан жаман болса да риза болады», – деп жауап береді.

Егер біз Құдайды сүйсек, онымыз естіліп, әрі көрініп тұруға тиіс. Құдай оған қуанады.

**Оқу үшін:** Зәбүр 146

**Сұрақтар:** Құдай бізді не үшін жаратты?

Біз тек өзіміз үшін ғана өмір сүре аламыз ба?

Сендер қалай ойлайсындар, Құдай біздің дауысымыз жаман болса да, Оны мадақтап, ән айтқанымызды қалай ма?

**Мінәжат:** Көктегі Әкеміз, маған қайырымды бола түсуге, Сенің даңқыңды арттыру үшін өмір сүруіме көмектес! Мен мұны Иса Мәсіхтің атынан сұраймын. Аумин.



## 7. Ұлы Жаратушымыз туралы көбірек біле түсейік

Сен көп білесің бе? Сен машиналар, ұшақтар туралы білесің, сондай-ақ, оқи және жаза білесің. Бірақ, ата-анаң сенен де көп біледі. Адам өмір бойы үйренеді. Әйтсе де, бәрін білуге ғұмыры жетпейді.

Бірақ бәрін білетін Біреу бар: Ол – Жаратушы Ие. Ол бәрін Өзі жасады және бәрін де Өзі біледі. Ол сенің қазір не ойлап отырғаныңды, тіпті, бұдан мыңдаған жылдар бұрын не болғанын да, болашақта не болатынын да біледі. Құдай, сондай-ақ, сенің Оны жақсы көретініңді немесе жақсы көрмейтініңді де біледі. Құдайдан бір нәрсені жасыру мүмкін емес, өйткені Ол барлық жерде болып, бәрін біліп тұрады және ештеңені ұмытпайды.

Өзі қалаған нәрсенің бәрін жасауға Құдайдың құдыреті жетеді. Оның қолынан келмейтін ештеңе жоқ. Ол науқасты сауықтыра алады. Ол дауыл соқтырып және оны қайта тоқтата алады. Ұлы Құдай адамдардың күнәсін кешіріп, оларға мәңгілік өмір сыйлай алады.

Құдайдың біз үшін аса маңызды тағы бір қасиеті: Ол ешқашан өзгермейді. Ол кеше, бүгін және мәңгілікке сол күйінде болады. Ол ешқашан қартаймайды және қуаты да азаймайды. Мүмкін, сенің қартайған атаң мен әжең бар шығар. Адам өзгереді. Жас кезінде олардың күш-қуаты бар, денсаулығы да мықты, ал қартайғанда – күш-қайраты кетеді. Ал Құдай әуел баста қандай болса, ғасырлар бойы сол күйінде қала береді.

Құдай бізді сүйеді, сондықтан бізге болашақты ойлап, қорқудың қажеті жоқ. Ол бәрін біз үшін ойластырып қойған. Біздің Құдайымыз – тамаша және құдыреттінің Құдыреттісі.

**Оқу үшін:** Зәбур 8

**Сұрақтар:** Құдай жаратқан бірнеше нәрсені ата. Тек Құдай ғана білетін бір нәрсені айт Құдай қартая ма?

**Мінәжат:** Біздің керемет және мәңгілік Құдайымыз, Аспандағы Әкеміз! Мен Сенің қолыңнан бәрі келетіндігі үшін ризашылығымды білдіремін. Сондай-ақ, Сенің маған деген сүйіспеншілігің ешқашан өзгермейтіндігі үшін алғыс айтамын. Сенің даңқыңды шығарып өмір сүру үшін маған көмектес. Аумин.

## 8. Періштелер

Құдай адамды жаратпай тұрып, алдымен Өзі аспанда тұруға белгілеген тіршілік иелерін жаратты. Оларды Киелі кітапта – періштелер деп атайды. Біз оларды көре алмаймыз және олармен сөйлесе алмаймыз. Бірақ, олар бізді көреді. Олардың кейбіреулері бізге өте жақын, бізге көмектеседі және қорғап жүреді.

Әрине, бұл оларға сеніп, алаңсыз жүре беруге болады дегенді білдірмейді. Олай етсек, бізге Құдайсыз да өмір сүре аламыз деген ой келуі мүмкін. Құдай ешқашан да бізге қауіп-қатерсіз өмірді уәде еткен жоқ, бірақ Ол періштелеріне Өз балаларының қамын ойлап жүруді бұйырды.

Кейбір періштелер айрықша дәрежеге ие. Мысалы, біз Киелі Жазбадан Жәбірейіл періште туралы білеміз. Ол – Құдайдың айрықша елшісі. Даниел пайғамбар Құдайға қатарынан бірнеше күн мінәжат еткенде, Құдай оған осы періштені жіберді. Кейіннен осы періште Жақия шомылдырушының әкесі – Зәкерияға да келді. Сондай-ақ, ол Мәриямға келіп, Құдайдың оны Иса Мәсіхке ана болуға таңдап алғанын айтты.

Сонымен қатар, біз Киелі кітаптан бас періште Микайл туралы да оқимыз. Ол Құдай періштелерінің ішіндегі ең күштісі болып табылады.

Бетлехем даласына бір топ періште келді де, малшыларға Құтқарушының дүниеге келгенін қуана хабарлап, Құдайды мадақтаған әндер айтты.

Адамдар секілді, періштелерді де Құдай жаратты, сондықтан да біздің оларға табынуға қақымыз жоқ. Мүмкін, сенің: «Періште болған қандай жақсы», – деп ойлаған кездерің болған шығар. Шынтуайттап келгенде, сенің адам болғаның әлдеқайда жақсы. Періштелер – Құдайдың қызметшілері. Ал біз – Оның балаларымыз. Құдайдың баласы болғаннан артық ешнәрсе жоқ! Біз Құдайдың өзімізді мәңгілік өлімнен құтқарып алғаны үшін қуануымыз керек. Ол бізді мәңгілікке қасына алуға уәде етті.

Мен сендерге періштені көрген бір жас жігіттің оқиғасын айтып берейін. Ол Еліше пайғамбардың қызметшісі еді. Пайғамбар Құдайдан халыққа Оның еркі туралы хабарлауға бұйрық алған болатын. Бұрынғыдай күнәһар болып жүре бергісі келген адамдарды пайғамбардың уағызы қатты ызаландырды. Бірақ, пайғамбар уағыз айтуын.



тоқтатқан жоқ. Сонда олар Елішеге қастық жасауды ойластырды. Сөйтіп, патша Елішені жазаға тартпақ болды. Патша оны тұтқындап әкелу үшін Еліше жүрген қалаға қалың әскер жіберді. Бір күні таңертең пайғамбардың қызметшісі қаланы әскерлердің қоршап алғанын көрді. Елішені ұстау үшін мыңдаған жасақ келіпті! Қызметші пайғамбарға жүгіріп келіп:

– Енді қайттік? Бізді әскерлер қоршап алыпты, олар сені ұстамақшы! – деді.

Сонда пайғамбар былай деді:

– Қорықпа! Құдай біздің жағымызда. Бізді айналамызда періштелер қорғап жүр.

Солай деп, Еліше Құдайға мінәжат ете бастады: «Тәңірім, менің қызметшімнің көзін ашшы, бізді қорғау үшін жіберген періштелеріңді көрсін». Құдай оның айтқанын орындап, қызметші өздерін айнала қорғап жүрген отты арбаларды көрді. Әскерлер жақындап келген кезде, өздерін таба алмас үшін Еліше Құдайдан олардың көздерін уақытша көрмейтіндей етіп қоюды сұрады. Құдай оның бұл тілегін де орындады. Осылайша Еліше пайғамбар мен оның қызметшісі ажалдан аман қалды.

**Оқу үшін:** Елшілердің істері 12:5–17

**Сұрақтар:** Біз періштелер жайында не білеміз?  
Ең құдіретті екі періштенің аттары?  
Адам періште бола ала ма?  
Сенің ойыңша: періште болған жақсы ма, әлде, Құдайдың баласы болған жақсы ма?

**Мінәжат:** Көктегі Әкеміз! Бізді періштелерің күзетіп жүретіні үшін ризамын. Сондай-ақ, Өзіңнің балаң болғаным үшін де алғысымды айтамын. Аумин.

## 9. Шайтан деген кім?

Біз шайтанды көре алмаймыз, бірақ ол бар және ол үнемі бізге де, Құдайға да бір жамандық жасауға тырысып жүреді. Әуелде ол Құдайдың ең ұлы періштелерінің бірі болған. Ол Құдайдың ең басты қызметшісі болып, Оның айтқандарын орындап жүрді.

Бірақ, күндердің күнінде ол Құдайды мойындауды да, Оның айтқандарын орындауды да қойды. Ол неге бұлай істеді және оған мұндай ойлар қайдан келді, оны біз білмейміз. Періште Құдайды көре алмай, онымен теңескісі келген болар. Осылайша шайтан Құдайдың дұшпанына айналды және сол уақыттан бастап Құдайға залал жасауға тырысумен келеді.

Бірақ, уақыты келген кезде Құдай Өзінің дұшпанын жазаға тартады. Тозақ деп аталатын орын бар. Шайтан мен оған қызмет ететіндер соған түсіп, мәңгілік азап шегетін болады.

Шайтанның жағына шығып кеткен періштелер де бар. Мұндай тұрақсыз періштелерді Киелі Жазбада – әзәзіл, жын-пері деп атайды. Олар да шайтан секілді, рух болып, айналамызда жүреді. Бірақ, егер біз Исаны жақсы көрсек және Оған жүрегімізден орын берсек, олар бізге ештеңе істей алмайды. Шайтан мен әзәзіл Иса Мәсіхтен қатты қорқады, себебі күндердің күнінде Оның өздерін мәңгілік тозақ отында өртейтінін біледі.

Шайтан бізді жамандық жасауға итермелеп бағады. Сондықтан да шайтанға құлақ асқан адамның күнә жасайтынын есімізден шығармайық!

Кейбір жерлерде шайтанның арбауы өте қатты болады, біз ондай жерлерден аулақ жүруге тиіспіз. Кей адамдар (оларды спириттер деп атайды) шайтанмен тілдеседі. Ондай кездерде шайтан өңін өзгертіп, олардың қайтыс болған туыстарының әруағы болып сөйлейді. Құдай Сөзінде ондай адамдармен сөйлесуге қатаң тиым салынған. Шайтан мен оның көмекшілері алдамшылар болып табылады.

Бір ауылда тұратын баланы шайтан әбден мазалайды. Бала Иса Мәсіхті білмейтін еді. Бірде баланың әкесі Исаның өз ауылдарына жақын маңда жүргенін естиді. Ол баланы Исаға ертіп әкеліп, Одан баланың бойындағы жын-шайтандарды қуып шығаруды өтінді. Иса оның бұл өтінішін орындап, шайтанға ол балаға қайта жоламауды бұйырды.

Шайтан Исаның алдында дәрменсіз, өйткені, Иса Мәсіх – Құдай.

**Оқу үшін:** Ишая 14:12–17; Матай 17:14–18

**Сұрақтар:** Тозақ дегеніміз не?

Шайтан деген кім және ол бұрын кім болған?

Шайтанның мақсаты не?

**Мінәжат:** Аспан мен жердің Жаратушысы, құдіреті күшті Құдай! Сенің балаң болғанымнан, маған шайтан билігін жүргізе алмайтыны үшін Саған алғыс айтамын. Жаман рухтардың барлығы Құтқарушымыз Иса Мәсіхтен қорқатыны үшін ризамын. Өмірімнің



соңына дейін Өзіңе адал болып қалуыма көмектес. Мен мұны Тәңірім – Иса Мәсіхтің атынан өтінемін. Амин.

## **10. Адам ата мен Хауа ананың жаратылуы**

Біз Құдайдың жұлдыздарды, жерді, аңдарды және тағы басқаларды қай уақытта жаратқанын білмейміз. Бірақ, Құдайдың оларды қалай жасағанын білесің бе? Оған бұл үшін ешқандай құрал-сайманның қажеті болған жоқ. Құдай оның бәрін Өзінің Сөзі арқылы жаратты. Ол күнге нұрыңды түсір деді – сонда күн нұрын шашты. Сондай-ақ, Құдай түрлі жануарларды, балықтарды, құстарды, ағаштарды, шөп пен гүлдерді жаратты. Құдай жаратқан әлем өте әдемі болды. Онда тікенектер болмады, жыртқыш аңдар да бір-біріне тиіспей, еркін жүрді.

Содан соң Құдай алғашқы адам: Адам атаны жаратты. Киелі кітапта бұл былай жазылған: «Сонда Құдай Ие жердегі топырақтан адамды жасап, оның мұрнына тіршілік лебін үрледі». Ойлап қараңдаршы, осындай тамаша дүниені алғаш көрген Адам ата қандай күйде болды десеңші! Осының бәрін Құдай адам үшін жаратты. Құдай, тіпті, адаммен сөйлесіп жүрді, мүмкін, Адам ата Одан өзін қалай жаратқанын сұрап, Құдай оған жауап берген де болар.

Бір күні Құдай Адам атаға көмекші етіп тағы бір адам – Хауа ананы жаратуды жөн көрді. Сірә, ол Адам атамен өте бақытты болған болар. Олардың ойларында жамандық, жүректерінде кірбің болған жоқ. Құдай оларды сүйді, олар да Құдайды жақсы көрді.

Құдай адамды Өзі жаратқанның бәрінен жоғары қойды. Адамның және әлемдегі басқа нәрселердің бәрінің жаратылуы – бұл таңғажайып керемет және ұлы ғажап құпия болып табылады. Бірақ, ең басты керемет – біздің Құдайды сеніммен танып, жүрегімізбен сүйе алатындығымыз.

**Оқу үшін:** Жар. баст. 2:7–25

**Сұрақтар:** Құдай адамды неден жаратты?

Құдай жерді қалай жаратты?

Адамның жаратылу тарихынан біз нені үйрене аламыз?

**Мінәжат:** Көктегі Әкеміз! Өзіңнің ұлы құдіретіңмен аспан мен жерді жаратқаның үшін алғысымды айтамын. Өзіңді бұдан да жақсырақ танып, бұдан да күштірек сүюімізге көмектес. Амин.

## 11. Бұл әлемге күнә қалай келді?

Шайтан Құдайды тыңдамағандықтан, енді ол бұдан әрі Оған қызмет ете алмайтын еді. Адам ата мен Хауа ананың бақытты өмір сүріп, олардың Құдайды сүйі шайтанның ішін күйдірді. Сондықтан ол Адам ата мен Хауа ананы Құдаймен араздастыруды ойлады. Егер бұлай істей алса, онда адамдардың бақытты өмірі аяқталатынын ол білді. Сонда Құдай адамдарды жазалауға мәжбүр болып, оларды жұмақтан қуады.

Құдай адамдарға бақтың ортасында өсіп тұрған ағаштың жемісінен жеуге тыйым салған еді. Шайтан Хауа анаға келіп, Құдайды тыңдамасаңдар да Ол

сендерді жазаламайды деп азғырды. Тыйым салған ағаштың жемісін жесеңдер, онда бәрін білетін боласыңдар, әрі ол өте дәмді деп үгіттей бастады. Ал бұл – сұмдық өтірік еді, бірақ Хауа ана шайтанның сөзіне сеніп қалды. Ол ағаштың жемісін үзіп алып жеді, Адам атаға да жегізді.

Ал одан кейін не болғанын білесіңдер ме? Тыйым салынған жемістен жегеннен бастап, Адам ата мен Хауа ана біртіндеп өлімге қарай қадам басты. Олар бұдан кейін де біраз уақыт өмір сүргендерімен, енді олардың өмірі бұрынғыдай бақытты болмады, күннен-күнге қартайып, әлсіз әрі көңілсіз бола бастады. Құдай оларды тамаша бақтан қуып жіберді және қайтып оралуға тыйым салды. Бұдан соң жерді тікенектер мен арам шөптер басып, Адам атаның жерді өңдеуі қиындап кетті. Мұның бәрі Құдайға құлақ аспаудың кесірінен болды. Мұның ақыры олардың ұрпақтары да Құдайдың айтқандарына құлақ аспауларына әкеліп соқты. Осылайша, біздің бәріміз де Құдайды тыңдамайтын болдық.

Көз алдыңа елестетші, әлемдегі адамдар енді ешқашан жамандық жасамайтын болса қандай жақсы болар еді. Онда ұрылар мен кісі өлтірушілер де, соғыстар да болмас еді.

Бірақ, сол күні адамзат тарихындағы ең қасіретті оқиға болды: адамдар өзінің Жаратушысына қарсы шықты. Киелі кітап бұл тілалмаушылықты – күнә деп атайды.

Адам ата мен Хауа ана тыйым салынған жемістен жесек, бізге ештеңе де болмайды деп үміттенді. Шайтанның қалағаны да дәл осы болатын.

Шайтан барлық уақытта да адамдарды адас-



тыруға тырысады, ол біздің Құдайды тыңдамағанымызды қалайды. Ол бізге: «Құдайды тыңдамасандар, бұдан да бақытты өмір сүресіңдер», – дейді. Бірақ, бұл – өтірік. Құдай Өзін тыңдамағандарды жазаға тартады. Өкінішке орай, Адам ата мен Хауа ана бұған тым кеш көз жеткізді.

**Оқу үшін:** Жар. баст. 3:1–19

**Сұрақтар:** Шайтан Құдайды жақсы көре ме?  
Ол адамдардың Құдайды сүйгенін қалай ма?  
Шайтан Хауаға не айтты?  
Тыйым салынған ағаштың жемісін жегеннен кейін, Адам ата мен Хауа анаға не болды?

**Мінәжат:** Көктегі Әкеміз! Мен Саған жиі құлақ аспағаным үшін өкінемін. Маған Өзіңді тыңдауға көмектес. Сондай-ақ, шайтанға алданбауым үшін де көмектес. Мұны Сенен Иса Мәсіхтің атынан өтінемін. Амин.

## 12. Күнәдан Құтқарушыны жіберу – Құдай жоспары

Біз Адам ата мен Хауа ана күнәға батқан қасіретті күн жайлы білдік. Олар өз дұшпандары – шайтанның айтқанын тыңдап, соның кесірінен үлкен бақытсыздыққа душар болды.

Бірақ, бізді сүюші Құдай адамдардың жүректерінің зұлым болып қалғанын қаламады. Ол алғашқы адамдарды күнәсі үшін жазалағанымен, оларды

мүлде жек көріп кеткен жоқ. Оны өзіңнің жаман қылықтарыңмен жиі ренжіткеніңе қарамастан, Құдай сені де жақсы көреді.

Құдайдың сені де, мені де жазадан құтқарғысы келеді. Бұл жазаны Өзінің мойнына алмақ болған Құдай жерге Өзінің Ұлы – Иса Мәсіхті жіберуді ұйғарды. Иса жерге келіп, барлық адамдардың күнәсі үшін жаза тартуға тиіс болды.

Сондықтан да Иса Бетлехемде Нәресте болып дүниеге келді. Ол сол жерде өзге балалар секілді ер жетті, бірақ Ол ешқашан күнә жасаған жоқ. Құдай Өзінің Ұлын сені мен менің күнәларымыз үшін жазалады. Зұлым адамдар Исаны айқыш ағашқа шегеледі де, Ол бәріміздің күнәларымыз үшін сол жерде құрбан болды. Исаның біз үшін қандай ауыр азап шеккенін көз алдымызға елестете де алмаймыз. Ол біз үшін өз еркімен азап шекті. Құдайдың бізге деген сүйіспеншілігі дәл осыдан көрінеді.

Бірде ұрлық жасаған адамды тұтқындап, оны соттың алдына алып келеді. Бір ғажабы, әлгі адам соттың ескі досы екен. Бірақ, сот әділетті болуға тиіс, сондықтан ол қылмыскерді өзінің ескі досы болғандығы үшін ғана босатып қоя бере алмайды. Сөйтіп, ол ұрланған заттарды қайтарып беруге және бір ай түрмеде отыруға үкім шығарды.

– Бұл ақша қазір менде жоқ қой, – деді ұры.  
Осы жерде сот таңқаларлық іс істеді.

– Жарайды, – деді ол. – Сенің қарызыңды мен-ақ төлейін. Сөйтті де, ақшасын суырып берді.

– Ал енді, – деді сот, – мен сен үшін түрмеге отырайын, сен үйіңе, отбасыңа бара бер.

Сөйтіп, ол ұрының орнына бір ай түрмеге отырып шықты, ал ұры босап, үйіне кетті.

Құдай да бізбен дәл осылай істеді. Өз күнәларымыз үшін бәріміз де жазалануға тиіс едік. Бұл жаза – мәңгілік өлім, Құдайдан мәңгілікке қол үзу болатын. Бірақ, Иса Мәсіх біздің күнәларымызды Өз мойнына алып, біздің мәңгілік өмір сүруіміз үшін Өз өмірін қиды.

Менің ойымша, Оның бізге деген ұлы сүйіспеншілігін ешқашан тиісті дәрежеде ақтай алмаймыз. Ал сен қалай ойлайсың?

**Оқу үшін:** Лұқа 22:39–46; 23:27–38

**Сұрақтар:** Құдай сені қаншалықты жақсы көреді?

Сенің Құдайға деген сүйіспеншілігің қандай?

Құдайға деген сүйіспеншілігіңді сен қалай көрсете аласың?

**Мінәжат:** Біздің көктегі Әкеміз! Тәңіріміз – Иса Мәсіхтің бізді сүйгендіктен, бәріміздің күнәларымыз үшін айқышта өлгенін жақсы білемін. Исаны шын жүрегіммен сүюге көмектес. Бүкіл өмірімді Саған қызмет етуге арнағым келеді және жүрегімді де тек Өзіңе ұсынамын. Амин.



### 13. Біздің мейірімді Бақташымыз

Исаның аспанда не істейтінін сен білесің бе? Ол Өзін сеніммен қабылдағандарға араша түседі. Шайтан Құдайға келіп, біздің істеген күнәларымызды тізіп айтқан кезде, Иса: «Мен олар үшін айқыш ағашта өлгенмін», – дейді.

Иса бізге қателіктерін қайта түзетсін деп, Өзінің Киелі Рухы арқылы істеген қателіктерімізді көрсетіп тұрады.

Иса біздің мейірімді Бақташымыз. Ол біздің Құдай балаларына лайықты өмір сүруімізге көмектеседі.

Алайда, Исаның бізді ғана емес, өзге адамдарды да жақсы көретінін ұмытпауымыз керек. Ол біздің Құдай туралы басқа адамдарға әңгімелеп беруімізге көмектеседі. Ол Иса Мәсіхтің барша адамдар үшін өлгенін барлық жерде айтып жүргенімізді қалайды. Ол Өзінің балаларын өзге адамдармен кездесу үшін түрлі елдерге жібереді. Осылайша, құтқарылу туралы қуанышты хабарды көптеген адамдар ести алады. Иса адамдардың барлығын, тіпті, Өзі туралы ештеңе білгісі келмейтіндерді де жақсы көреді.

**Оқу үшін:** Рим. 8:35–39

**Сұрақтар:** Иса аспанда біздер үшін не істейді? Исаның бізге деген сүйіспеншілігі неден көрінеді?

Біз барлық адамдарға не туралы айтуға тиіспіз?

**Мінәжат:** Көктегі Әкеміз, Сенің ұлы сүйіспеншілігің үшін және бізді Сенің қолыңнан ешкім тартып ала

алмайтындығы үшін алғысымды айтамын. Өзіңді сүйеге және еркінді орындауыма көмектес. Өзге адамдарға Құтқарушы туралы айту үшін маған күш пен қабілет бер.

#### **14. Егер Исадан: «Менің жеке Құтқарушым бола гөр» деп сұрасақ, не болады?**

Құдай – мәңгілік. Оның бастауы да, шегі де жоқ. Ең басында адамдар да, жер де болған жоқ. Құдай – мәңгілік қана емес, Ол бәрін білуші. Ол сенің дүниеге келетініңді баяғыда-ақ білді және сол кезде-ақ сені жақсы көрді.

Сонымен қатар, Ол күндердің күнінде сенің күнәлар жасайтыныңды да білді. Бұл оны ренжітті. Ол сені бұл үшін жазаға тартуына тура келетінін де білді. Бірақ, Құдай сені жазалағысы келмеді, сондықтан да Ол жазаны Өзі көтеруге бел бұды. Иса Мәсіх Өзінің көктегі мекенін тастап, сені мен менің орныма жаза тарту үшін жер бетіне келуге шешім қабылдады. Бұл осыдан 2000 жылдай бұрын болған еді. Иса барлық адамдардың күнәсі үшін өлді. Енді сен де Одан: «Менің жеке Құтқарушым бол» деп сұрай аласың.

Мүмкін, сен мұны қалай істеу керектігін білмейтін боларсың? Бұл тіпті де қиын емес. Иса біздің күнәларымыздан тазарғымыз келетінін біз айтпай тұрып-ақ біледі. Сөйте тұра, Ол біздің бұл тілегімізді мінәжатта Өзіне айтып бергенімізді қалайды. Мысалы, біздің былай деуімізге болады: «Иеміз Иса, мен өз өмірімде көптеген күнәлар жасап, Сені жиі ренжіттім. Мені кешір! Сен осы әлемге келіп, менің

жасаған күнәларым үшін жаза тарттың, Сен мен үшін Өзіңнің өміріңді қидың. Менің мәңгілік өмірге ие болуым үшін айқыш ағашта жан бердің. Маған істеген осыншама қайырымдылығың үшін алғысымды айтамын. Мен ешқашан да өзіме көмектесе алмас едім, бірақ, Сен келіп, маған мәңгілік өмірді сыйға тарттың. Саған өте ризамын. Аумин».

Әрине, саған міндетті түрде тура осы сөздерді қайталап айтудың қажеті жоқ. Сен өз сөздеріңмен де мінәжат ете аласың.

Біз күнәларымыз үшін кешірім сұрағанымызда, Иса қуанады. Мүмкін, сен бұл туралы Одан сұрап та қойған боларсың? Ал егер олай болмаса, онда сен мұны дәл қазір істей аласың. Құдай сенің Өзіне бет бұрғаныңды күтеді.

**Оқу үшін:** Жохан 3:1–18

**Сұрақтар:** Сенің күнәларың үшін кім жазаланды?

Иса біздің жеке Құтқарушымыз болуы үшін не істеуіміз керек?

**Мінәжат:** Бізді сүюші Иса! Өз күшіммен мәңгілік өмірге ие бола алмайтынымды білемін. Маған мәңгілік өмірді бергенің үшін алғыс айтамын. Сонымен қатар, Өзіңмен аспанда мәңгі бірге болатыным үшін де рахметімді айтамын. Аумин.



## 15. Иса мені не үшін құтқарды?

Бір адамның иті болыпты. Олар бір-бірінен ажырамай, ұдайы бірге болады.

Бірде әлгі адам кемемен саяхатқа шығып, итін де өзімен бірге ала кетеді. Бір күні иесінің артынан жүгіріп жүрген ит кенеттен суға құлап кетеді. Иттің иесі кеме капитанына жүгіріп келіп:

– Менің сүйікті итім суға құлап кетті! Ол суға батып кететін болды, тезірек кемемені тоқтатыңыз! – дейді.

Капитан күліп:

– Қайдағы бір ит үшін кемемені тоқтата алмаймыз ғой... – деп жауап береді.

– Ал егер суға адам құлап кетсе, кемемені тоқтатар ма едіңіз?

– Әрине, – дейді капитан.

Сол кезде иттің иесі кемеден суға секіріп кетеді. Оны құтқару үшін капитанның кемемені тоқтатуына тура келеді. Сөйтіп, адам да, ит те құтқарылады.

Иса бізді итін жақсы көрген әлгі адамнан әлдақайда артық сүйеді. Ол біздер батып жатқан күнә «теңізіне» секіріп түсіп, бізді құтқарып алды.

Барлық періштелер, сондай-ақ шайтан мен оның қызметшілері де Құдай сүйіспеншілігінің қандай тамаша екенін көріп тұрады. Құдайдың бізге деген сүйіспеншілігінің ұлылығы сондай, ол бізді күнәһар екендігімізге қарамай қабылдап алды. Ол бізге Иса Мәсіхті сүйетін жаңа жүрек береді. Аспандағы періштелер Құдайдың біз үшін істегендеріне алғыстарын айтады. Олар сеніңде Исаны сүйетіндігің үшін қуанады.

Тек әлі де Құдайдың қалағанындай бола алмай жүргеніміз өкінішті. Біз әлі көптеген жамандықтар жасаймыз. Ал, Құдай бізді қазірдің өзінде өліден қайта тірілгеннен кейінгі болатын қалпымызда көріп тұр. Иса Мәсіхтің өлімі арқылы біздің барша күнәміз кешірілді. Бізден талап етілетіні, тек Құтқарушымызға сенім арту ғана, сонда біз Құдайдың алдына ешқандай күнәсіз және еш кінәратсыз күйімізде бара аламыз.

**Оқу үшін:** Лұқа 15:3–7; 11–24

**Сұрақтар:** Күнәһарлар өздігінен Құдайдың балалары бола ала ма?

Бізді кім Құдайдың баласы ете алады?

Қалай Құдайдың баласы болуға болады?

**Мінәжат:** Иса Мәсіх, мен үшін және менің күнәларым үшін құрбан болғаныңа алғысымды айтамын. Амин.

## 16. Егер жақсы болуға тырыссам, Иса мені құтқара ма?

Біздің ешқашан да Құдайға ұнайтындай жеткілікті дәрежеде жақсы бола алмайтынымызды білесіңдер ме? Кей балалар: «Егер де мен әрқашан ата-анамның айтқанын тыңдауға тырыссам, өзге балалармен таласып, төбелеспейтін болсам, әлсіздерге тиіспесем, онда мен жұмаққа барамын», – деп ойлайды.

Бірақ, бұлолай емес. Жұмаққа ешкім де өзкүшімен бара алмайды. Себебі, біз бәрібір сөздерімізбен,

істерімізбен Құдайды ренжітіп аламыз, біз қанша тырысқанымызбен, күніне ең құрығанда бір жаман сөз айтамыз, не басымызға бір жаман ой келеді. Бұл – біздің жүрегімізде әлі де көп жамандық барын көрсетеді.

Біз болашақта бәрін дұрыс істеуге қол жеткізген күннің өзінде, бұрынғы күнеларымыз бәрібір мойнымызда қала береді. Одан қалай құтылуға болады? Тағы бір сұрақ: Құдайдың жазасына ілігу үшін адам қанша күнә істеуі керек? Он ба, әлде жүз күнә ма? Жоқ, бір ғана күнәнің өзі жеткілікті.

Бұған қоса, алғашқы адамдар – Адам ата мен Хауа ана пейіш бағында Құдайдың айтқанына мойынсұнбай, күнә жасады. Содан бастап адамдардың бәрі күнәһар болып табылады. Сондықтан да, кішкентай балалардың өздері кейде ата-аналарының айтқандарына құлақ аспайды, тіпті, керілдесіп, төбелесуге дейін барады.

Біз не істесек те, қаншама тырыссақ та жұмаққа апаратындай еңбек сіңіре алмаймыз. Құдай әділетті, сондықтан да Ол адамдарды күнелары үшін жазалауға тиіс.

Бірақ, Құдай адамдарды жақсы көреді. Сондықтан да Ол Өзінің Ұлы – Иса Мәсіхке біздің барша күнәмізді артып, Оны біздің орнымызға жазалады. Иса Мәсіх сенің және менің күнеларымыз үшін өлді. Ол біз үшін жаза тартты. Ойлап қарашы, Исаның сені сүйетіні сондай, Ол сен үшін Өзінің өмірін қиюға келісті!

**Оқу үшін:** Рим. 3:10–18, 23

**Сұрақтар:** Сенің жамандық жасаған кезің болды ма? Бір-екі мысал келтір.



Жұмаққа барудан қағылу үшін қанша күнә жасау керек?

Құтқарылу үшін сен не істей аласың?

**Мінәжат:** Біздің көктегі Әкеміз! Мен Сенің алдыңда күнә жасадым. Бірақ, Сен менің күнәмді өтеу үшін Өзіңнің Ұлынды жібердің. Маған көктен орын даярлап қойғаның үшін шын жүрегіммен алғыс айтамын. Амин.

## 17. Патшаның балалары

Кейде біз: мәсіхші – Құдайдың баласы дейміз. Бұл біздің өнді өз ата-аналарымыздың балалары емес екенімізді білдіре ме? Әрине, олай емес! Құдай ата-ананы біздерді жақсы көріп, қамқорлық жасау үшін берді. Бірақ, Құдай біздің қамымызды ата-анамыздан да артық ойлайды, себебі Ол бізді ата-анамыздан әлдеқайда артық жақсы көреді.

Егер біз Құдайдың Ұлын жақсы көріп, Оған сенім артатын болсақ, онда Құдай бізді Өз отбасының қатарына қабылдап, Өзінің баласы етеді. Бұл деген тамаша емес пе?

Неге және не үшін Құдай бізді Өзінің балалары етеді? Неліктен Ол бұрын күнәһар болғандарды Өзінің балалары еткісі келеді. Бұл біз үшін жұмбақ күйінде қалады. Алайда, Киелі кітап Құдай бізді Өзінің балалары деп атаудан ұялмайды дейді. Ол бізді ешқашан кері итермейді. Құдай бізді кейде тыңдамай кеткен кезіміздің өзінде жақсы көреді. Оның айналасында таңдап алған, өзгелерден ерекше жақсы көретін ешкімі жоқ. Ол бәрімізді тең жақсы

көреді. Кейде бізді Өзінің әділдігіне сай жазалауына тура келгенімен, біз Оның балалары болғандықтан, Ол бізді бәрібір жақсы көреді.

Құдай – біздің көктегі Әкеміз болғанда, Оның Ұлы – Иса Мәсіх бізді шын жүрегімен сүйетін үлкен Ағамыз болып табылады.

Сол себепті де, Киелі кітап Исаның бізді Өзінің іні-қарындастарым деп атаудан ұялмайтынын айтады. Ол бізді Құдайдың үлкен отбасына мүше ету үшін құрбан болды. Енді Иса Өзінің Көктегі Әкесінен алғандарының бәрін бізге бөліп береді. Уақыты келгенде Ол бізді көкке әкетеді де, сол жақта Өз қуанышын толығынан береді. Ол жерде енді күнә болмайды.

Біз Патшаның балаларымыз, себебі Құдай бізді Өзінің отбасына мүше етіп алды. Ол бізге ғажайып дарындар сыйлады, сөйтіп, бір кездері Онымен мәңгі бірге боламыз.

**Оқу үшін:** Рим. 8:14–17

**Сұрақтар:** Біздер жақсы болғандықтан, Құдай бізді Өзіне бала етіп алғысы келе ме?

Құдай бізді күнә жасаған кездерімізде де сүйе ме?

Тыңдамаған кездерімізде Құдай бізді қандай жолмен жазалайды? Ол бізді мұндай кездерде жақсы көре ме?

Құдай біздің Әкеміз болғанда, Оның Ұлы – Иса Мәсіх бізге кім болады?

**Мінәжат:** Жаратушы Ием! Мені Өзіңнің балаң етіп алғаныңа қуаныштымын. Саған ризамын, себебі Сен маған өте жақсы қарайсың. Аумин.

## **18. Дүниеге келгеннен бұрын, Иса қайда болды?**

Туылу мейрамында біз Иса Мәсіхтің туғаны жайлы әңгімелер айтып, ән саламыз. Періштелердің осынау қуанышты хабарды малшыларға қалай хабарлағанын қызыға тыңдаймыз.

Бірақ, сен Иса Мәсіхтің бұл дүниеге келгеннен бұрын да бар болғанын білесің бе? Ол әрдайым көкте, Өзінің Аспандағы Әкесімен бірге болды: өйткені Оның Өзі – Құдай.

Әуелде Құдай бүкіл әлемді жаратты. Содан соң алғашқы адамдар – Адам ата мен Хауа ананы жаратты. Бірақ Адам ата мен Хауа ана Құдайға құлақ аспады. Құлақ аспаудың соңы қашанда жазаға алып келеді. Иса біздің жазаланғанымызды қаламады, сондықтан да Ол жерге келіп, біздің барлық күнәларымызды Өз мойнына алуды ұйғарды.

Міне, сөйтіп Ол жер бетінде дүниеге келді. Өзі Нәресте болып туылып, адамдардың арасында өмір сүруге дайын болған Иса Мәсіхтің бізге деген сүйіспеншілігінің қаншалықты зор болғанын көз алдыңа елестете аласың ба?

Сондықтан, Исаның сені дүниеге келмей тұрғанда-ақ жақсы көргеніңе сенімді бола аласың. Ол сені қазір де, сен өлгеннен кейін де жақсы көреді. Егер сен Исаға шын жүрегіңмен қызмет етсең, онда аспанда Онымен мәңгі бірге бола аласың.



**Оқу үшін:** Жохан 14:1–12

**Сұрақтар:** Исаның бұдан қанша жыл бұрын дүниеге келгенін білесің бе?

Иса бұл дүниеге келерден бұрын қайда болды?

Иса неліктен аспанды тастап, жерге келуге бел буды?

Сен қалай ойлайсың: Иса сені сүйе ме?

Сен Исаны сүйесің бе?

**Мінәжат:** Ием Иса! Аспанды тастап, осы дүниеге келгеніңе, бәріміз үшін құрбан болғаныңа алғысымды айтамын. Сенің даңқыңды көтеріп өмір сүруіме көмектес. Амин.

## **19. Иса-Сәбидің өзге балалардан қандай айырмашылығы болды?**

Исаның дүниеге келуі өте ғажап, әрі құпия болғанын білесің бе? Исаның шешесі – Мәриям еді. Ал, Жүсіп – Мәриямның күйеуі болғанымен, Исаның әкесі емес.

Исаның әкесі өзге балалардыкі секілді адам болған жоқ, Оның Әкесі – Құдай.

Исаның әкесі Құдайдың Өзі болуы неліктен маңызды? Егер Исаның әкесі Жүсіп болса, не болар еді? Егер де Исаның әкесі Құдай болмағанда, онда Ол біз секілді қарапайым адам болар еді. Онда Исаның жүрегі өзге адамдардікі секілді бұзылған жүрек болатын еді. Егер Исаның жүрегі сені мен менің жүрегім секілді болғанда, онда Ол біздің күнәларымыз үшін өле алмайтын еді. Оның Өз

күнәлары үшін өлуіне тура келетін еді. Бірақ, Иса Өз күнәлары үшін өлген жоқ, себебі Оның еш күнәсі болмады.

Исаның туылуының көптеген таңқаларлық жақтары болды. Исаның жерде әкесі болмағандықтан, біз Оны Мәриям қыздан туылды дейміз. Одан басқа ешкім де мұндай жолмен дүниеге келген емес. Бір адам құмырсқаны бақылап, соңынан жүреді. Сөйтіп жүріп, ол құмырсқаның үлкен илеуіне келеді. Ол жерде мыңдаған құмырсқалар бар еді. Әлгі адамға: «Егер мен осы құмырсқалармен сөйлескім келсе, не істер едім? Мен қанша айқайласам да олар түсінбейді. Егер мен оларға жазып берсем, олар оны оқи алмайды», – деген ой келеді. Сөйтіп, ол: «Егер осы құмырсқалар мені түсінсін десем, онда менің өзім де құмырсқаға айналуым керек», – деген қорытындыға келді.

Содан соң әлгі адам: «Құдай да дәл осыны істеді. Ол адамдарға аспаннан қарап отырмай, біздің ішіміздегі біреу болайын деп шешті. Ол Өзінің бізге деген сүйіспеншілігін осылайша түсіндіре алды. Сондықтан Иса кішкентай Нәресте болып дүниеге келіп, үлкен Адам болып өсті. Ол Өзінің адамдарға деген сүйіспеншілігін осылай дәлелдеді. Сол үшін де Ол біздің бәріміз үшін өлді», – деп ойлады.

**Оқу үшін:** Матай 1:18–25

**Сұрақтар:** Исаның шешесі кім?

Исаның Әкесі кім?

Жүсіп кім болды?

Исаның әкесі Жүсіп болғанда, онда біздермен не болар еді?

**Мінәжат:** Көктегі Әкеміз! Иса Сенің Ұлың болғаны қандай керемет! Оның ешқандай күнәсі болмағаны үшін және біздің күнәмізге бола өлгені үшін Саған алғыс айтамын. Бізді балаларым деп қабылдағаның үшін мың да бір алғыс! Аумин.

## 20. Иса жасаған кереметтер

Сірә, сен Исаның жер бетінде жасаған кереметтерінің кейбірі жайлы білетін де боларсың? Мысалы, бірде Исаның қайықпен үлкен көлдің арғы бетіне өткені жайлы. Сол кезде аяқ астынан қатты жел тұрды. Оның шәкірттерінің үрейлері ұшып кетті, ал Иса қайықта қаннен-қаперсіз ұйықтап жатты. Шәкірттер өздерінің Ұстазын оятып: «Қалайша сен қайықтың суға кетіп бара жатқанын сезбейсің, бәріміз қырылатын болдық қой! Сен неге бізге бұл қатерден құтылуға көмектеспейсің?» – деді. Иса шәкірттерінің мұндай сенімсіздік көрсеткеніне қатты қынжылды. Сөйте тұра, желдің, толқындардың басылуын бұйырды. Сол сәтте жел де, толқын да сап тиылды.

Келесі жолы Ол бұдан үлкен керемет жасады. Оның досы Елазар ауыр науқастан қайтыс болды. Туыстары оны қабірге апарып жерледі. Елазардың онда жатқанына төрт күн болған еді. Иса Елазардың қарындастарын аяп кетті, себебі Елазар – олардың жалғыз ағалары еді. Иса Елазардың зиратына келіп, оны қатты дауыстап шақырды. Сол-ақ екен, Елазар қабірден тіріліп шықты! Иса оны қайта тірілтіп алды!

Ал мынау, Ол жасаған тағы бір керемет! Бірде Исаның жанына бес мыңдай адам жиналды. Олар күні бойы Исаның уағызын тыңдады. Кешке қарай



бәрінің қарындары ашты, бірақ, олардың нан сатып алатын мүмкіндіктері жоқ еді. Олардың ішіндегі бір баланың өзімен бірге әкелген бес күлше наны мен екі балығы бар екен. Иса шүкірлік етті де, оларды адамдарға таратып беруді бұйырды. Бес мың адамға сол азық молынан жетіп, тіпті, артылып та қалды.

Бірде Иса өліп қалған бір кішкентай қызды да қайта тірілтті. Қыздың ата-анасының сондағы қуанышын көрсең ғой!

Иса бұлардан басқа да көптеген кереметтер жасады. Адамдар оны істей алмайды. Кереметтерді тек Құдай ғана жасай алады. Еш дәрігер сырқатты бір сәтте сауықтыра алмайды. Исаның жасаған кереметтері Оның Құдай Ұлы екенін дәлелдейді.

Аспанға көтеріліп кеткен соң, Ол Өзінің шәкірттеріне Құдайдың атынан кереметтер жасауға күш берді. Сондықтан да елші Петір сал ауруымен ауырған бір адамға: «Иса үшін орныңнан тұр да, өздігіңнен жүріп кет», – деп бұйырғанда, әлгі кісі сауығып кетті.

Кейіннен осы елші Петірді Иса туралы уағыздағаны үшін түрмеге қамады. Түнде Құдай Өзінің бір періштесін жіберіп, Петірді түрмеден шығарып жіберді. Бұл – нағыз керемет еді.

Көптеген адамдар Иса жасаған кереметтерге сенгілері келмейді. Олар Иса ешқандай керемет жасаған жоқ, мұның бәрі сиқыршының епті қимылдары дейді. Бірақ, Иса ешқандай да сиқыршы емес. Ол – Құдай. Сондықтан Ол, тіпті, өлген адамдарды да тірілте алады. Мүмкін, сен: «Мұндай кереметтер қазір де бола ма?» – деп сұрарсың. Әрине! Иса мұны Өзінің Сөзінде уәде етті. Кейде дәрігерлер сырқатты

жаза алмайды, сол кезде сенушілердің мінәжаты бойынша Иса оларды сауықтырады. Әрине, Ол дәрігерлер арқылы да көмектесе алады. Құдайға сиынған кезде, біз ұдайы дерлік Одан кереметті күтеміз. Біз өз қолымыздан келмейтін нәрсені Құдай жасайды деп күтеміз.

Құдай біз сұраған сайын керемет жасап тұра ма? Жоқ. Құдай кейде біздің сұрағанымызды бермеуді жөн санайды. Ол бізге ең маңызды деген нәрсені бергенді дұрыс көреді. Сондықтан біз Оған еш алаңдамай, сенуімізге болады.

**Оқу үшін:** Марқа 6:32–44

**Сұрақтар:** Керемет дегеніміз не?

Иса жасаған кереметтердің бірін айтып бер.

Сиқыршы дегеніміз кім? Ол шынымен де кереметтер жасай ала ма?

Мінәжат еткеннен кейін өз өміріңде Құдай істеген бір керемет туралы айтып бер.

**Мінәжат:** Жаратушы Ие! Мен Саған жер бетінде болған кезінде жасаған барлық кереметтерің үшін рахметімді айтамын. Сондай-ақ, мен Саған қазір де мінәжаттарымды естіп, керемет істер жасайтының үшін алғыс айтамын. Мінәжат еткен кезімде Өзіңнің көмегіңе деген сенімімнің берік болуына көмектес! Амин.

## 21. Иса Мәсіхтің өлуі

Енді біз ең қорқынышты, бірақ, тарихымыздағы ең маңызды оқиға туралы айтайық.

Адам ата мен Хауа ананың тыйым салынған жемістің дәмін татқандары есіңде ме? Сол сәтте адам жүрегіне күнә алғаш еніп, олар Құдайға мойынсұнбайтын болды. Содан бастап олар тамақтарын табу үшін ауыр жұмыс істеуге мәжбүр болып, ауру мен өлімнен қорқа бастады. Жабайы аңдар олардың жауына айналды. Мұның бәрі Адам ата мен Хауа ананың Құдай алдында күнә жасағандарының кесірінен болды.

Бірақ Құдайдың: «Енді менен алыста өмір сүресіңдер», – дегені бәрінен де ауыр тиді.

Алайда, Құдай сені мен мені қалай сүйсе, Адам ата мен Хауа ананы да солай сүйгенін есіңнен шығарма. Сен де, мен де алғашқы адамдар секілді жаза тартуға лайық күнә жасадық. Бірақ, Құдай бізді сүйеді, сондықтан Ол біздің орнымызға Өзінің Ұлы Иса Мәсіхті жазалауды жөн көрді.

Өзіміз де күнәһар болғандықтан, біздің ешқайсымыз өзгелердің күнәсі үшін өле алмайтын едік. Біз өз күнәларымыз үшін жаза тартуға тиіс болдық. Ал, Құдайдың Ұлы Иса Мәсіх күнәдан пәк еді, сондықтан тек Сол ғана өзгелердің, сенің және менің күнәларымыз үшін өле алатын.

Исаны жек көрген адамдар Оны айқыш ағашқа әкеліп шегеледі. Ол сонда өлді. Рим жасақшылары қолы мен аяқтарын айқышқа шегелеген кезде, Ол ғаламат азап шекті. Құдай Әкесі Оны алғаш рет, аз уақытқа айқышта қалдырып кеткенде Иса қандай



күйде еді? Ол жалғыз қалды. Иса мен үшін, сен үшін өлімге Өз еркімен барды. Оны ешкім мәжбүрлеген жоқ. Ол біз жасаған күнәнің құнын өтеу үшін өлімге барды.

Енді Құдай сенің күнәларыңды кешіре алады. Құдай Иса Мәсіхке сенім артқан әркімнің күнәларын кешіріп, мәңгілік өмірді сыйға тартады. Сен бұл үшін Исаға алғысыңды айттың ба?

**Оқу үшін:** Ишая 53:1–12

**Сұрақтар:** Адам ата мен Хауа ана Құдайды тыңдамағаннан кейін, олармен не болды? Егер бұл дүниеде күнә болмағанда, онда адамдар өзара араздасар ма еді?

Біз өзіміз жақсы көретін адамдарымыздың күнәларын өз мойнымызға ала аламыз ба?

Бұл неліктен мүмкін емес?

**Мінәжат:** Көктегі Әкеміз! Қазіргі кезде балалардың өздері Құтқарушыға мұқтаж екенін байқап жүрмін, себебі, олар да тілазар болып бара жатыр. Иса, біз үшін өлгеніңе алғыс айтамын. Өзіңді шын жүректен сүюіме көмектес. Аумин.

## 22. Исаның қайта тірілуі

Иса өлгеннен кейін Петір, Жақып, Жохан және тағы да басқа шәкірттер қатты қайғырды. Олар Исаны Исраилдің Патшасы болады деп үміттенген еді. Өйткені Ол соншама адамдарға жақсылық жасады және көптеген кереметтер істеді. Сондықтан

олар Исаны айқыш ағашқа шегелеп жатқанда, Оның ешқандай қарсылық көрсетпегеніне қатты таңданды. Олардың ойына: «Мүмкін, Иса – Құдайдың Ұлы емес шығар? Ол жай ғана жақсы адам болған болар» деген күдік те пайда болды.

Мәсіхтің шәкірттері үш күн бойы қалада сенделіп жүрді. Үш жыл ішінде Исаға бауыр басып қалған олар енді Онсыз қалай күн кешуді білмеді. Аптаның бірінші күні, қазір біз оны қайта тірілу күні деп атаймыз, Исаның бірнеше шәкірті Ол жерленген жартасқа барды. Жартасқа жақындап келген шәкірттер қатты таңғалды: қабір бос қалыпты. Күні кеше ғана Исаның денесі қойылған қабір қазір бос тұр. Мүмкін, Оны біреулер ұрлап әкетті ме? Әлде, басқа жерге ауыстырып жерлеп қойды ма? Шәкірттер осылайша дал болып тұрғанда, кенеттен екі періште шыға келіп, Исаның қайта тірілгенін, және таяуда Оның шәкірттерімен кездесетінін айтты. Әрине, бұл шәкірттер үшін адам сенгісіз нәрсе еді. Көп ұзамай, Иса шынында да шәкірттеріне көрінді. Сыртынан қарағанда, Ол бұрынғы қалпында болып көрінеді. Бірақ, Оның денесі өзгеріп кетіпті. Енді Оған қалың қабырғалардың өзі бөгет бола алмайды. Ол енді есігі жабық тұрған бөлменің ішінде де пайда бола алады және көзді ашып жұмғанша ғайып болып кете алады.

Құдайдың Өз балаларын өліден қайта тірілтіп аламын деген уәдесі бар. Мүмкін, сен: «Бұл шынымен-ақ мүмкін бе?» деп сұрарсың. Құдайдың қолынан бәрі келеді. Исаны қайта тірілтіп алған Құдай, Оның басқа шәкірттерін де тірілте алады. Иса Мәсіхке сенетіндерге Құдай мәңгілік өмір береді.

Көптеген адамдар: «Исаның шынымен қайта тірілгенін сіз қайдан білесіз?» – деп сұрайды. Біз оның растығын шәкірттердің ісінен көреміз. Иса өлгеннен кейін олар қатты қайғырып жүрді. Бірақ, Исаның қайта тірілгенін көргенде, олар қуанышты күйге еніп, батылданып кетті. Жүрген жерлерінде Исаның қайта тірілгенін уағыздаған олардың кейбірі өлім жазасына кесілді. Егер Исаның қайта тірілгені рас болмаса, онда олар бұл үшін өмірлерін қимас еді.

Иса өлген соң, үш күннен кейін Оның екі шәкірті Иерусалимнен көрші елді мекенге қарай жолға шықты. Әрине, олар Иса және Оның өлімі туралы әңгімелесіп келе жатты. Ол неліктен өлді? Олар Иса мәңгі өмір сүреді және өздерінің Патшасы болады деп үміттеніп еді ғой. Екеуі осылайша әңгімелесіп келе жатқанда оларға тағы бір жолаушы келіп қосылды. Әңгімеге араласқан ол шәкірттерден не үшін көңілсіз келе жатқандар сұрады. Шәкірттер мұның себебін айтқан кезде, Ол: «Құдай Сөзінде Иса көп азап шегіп, содан соң өлуге тиіс деп жазылғанын білмейсіңдер ме? Ол Өзінің өлетінін алдын ала айтып еді ғой», – деді. Көнеөсиеттік пайғамбарлықтарды айтып шыққан ол шәкірттерге Мәсіхтің өлімі кездейсоқтық еместігін түсіндірді. Құдай жер бетіндегі адамдардың күнәсін мойнына алып, олар үшін өлуге Өзінің Ұлын әдейі жіберген. Егер Мәсіх айқыш ағашта өлмесе, онда ешкімнің де күнәсі кешірілмес еді.

Осылай әңгімелесіп келе жатқан олар ауылға да келіп жетті. Кеш болып кеткендіктен, шәкірттер әлгі Бейтанысты үйге кіруге шақырды. Ол келісті. Кешкі асқа отырған кезде шәкірттер әлгі Бейтаныстың – өз Ұстаздары екенін таныды! Жол бойы Өзінің өлімінің



себебін анықтап айтып берген Исаның Өзі болып шықты. Қатты таңданған шәкірттер өз-өздеріне келгенше Иса ғайып болып кетті.

Қайта тірілген Исаны көрген олар қандай бақытқа кенелді десеңдерші! Енді бәрі өзгерді: олар енді қайғырмайды және ешкімнен де қорықпайды, өйткені олардың Ұстаздары – тірі! Иерусалимге қайтып оралған олар өзге шәкірттерге болған жағдайды айтып берді.

**Оқу үшін:** Жохан 20:1–18; Лұқа 24:13–32

**Сұрақтар:** Бос қалған қабірді көрген шәкірттер неге сонша таң қалды?

Исаға не болды?

Қайта тірілген Исаның денесінің сені мен менің денемнен қандай айырмашылығы болды?

Иса мен Оның екі шәкірті туралы әңгімені қайталап айтып бере аласың ба?

**Мінәжат:** Аспандағы Әкеміз! Мен Саған Иса Мәсіхті қайта тірілткенің үшін алғыс айтамын. Сондай-ақ, Исамен мәңгі бірге болатыным үшін де рахмет айтамын. Сенің ұлы құдіретің мен шексіз сүйіспеншілігіңді жиі еске алуыма көмектес. Амин.

## 23. Иса Өз Әкесіне қайтып оралды

Сенің бірнеше күнге ата-анаңнан алысқа кеткен кездерің болды ма? Мүмкін, сен туыстарыңа немесе әжеңе барған боларсың. Үйіңе қайтып оралғанда қалай қуанғаның есінде ме?

Иса шамамен 33 жыл жер бетінде өмір сүрді. Сен Оның Өз Әкесі мен періштелерді қатты сағынып, үйіне қайтуды қалай аңсағанын білесің бе? Міне, Оның аспанға қайтып оралатын уақыты да келіп жетті.

Ол шәкірттерін ертіп таудың басына көтерілді. Шәкірттерімен сөйлесіп тұрғанда бір үлкен бұлт келді де, Иса оның ішінен еніп, көрінбей кетті.

Иса аспанға қайтып оралып, Құдай тағынан орын алды. Әрине, бізге ол аспан көрінбейді. Бірақ, уақыты келгенде Исаға сенетін және Оған қызмет ететіндердің бәрі сол жерде Исамен бірге болады.

Біз Иса аспанға қайтып оралған кезде онда болған қуанышты көз алдымызға елестете алмаймыз. Оны миллиондаған періштелер ән айтып қарсы алды. Олар жер бетіндегі бар адамға деген ұлы сүйіспеншілігі үшін, Исаға иіліп тағзым етті. Ол Өзінің даңқын қалдырып, сені мен мені құтқару үшін жерге Адам болып келді. Енді Ол үйіне қайтып оралды! Құдай Әкесі де Оның қайтып оралғанына қуанып, шаттана қарсы алды.

Иса қазір де аспанда. Ол бізге сол жақтан орын дайындап жатыр. Ол бізді күтеді және адамдардың бәрінің Өзіне сенім артқанын қалайды. Ол Өзіне сенім артқан әркімге мәңгілік өмірді береді.

Иса Мәсіх Құдайдың алдында біз үшін куәлік етеді.

Бірақ, Өзіне қызмет еткендерді алып кету үшін, Ол тағы да жерге келеді.

**Оқу үшін:** Ел. іст. 1:9–14

**Сұрақтар:** Иса жер бетінде қанша уақыт болды?

Иса Аспандағы Өкесіне қайтып оралатын кезінде шәкірттерінің қасынан қалай кеткенін айтып бер.

Сенің ойыңша, Иса аспанға қайтып оралғанда періштелер не істеді?

Иса қазір қайда?

Иса аспанда не істеп жатыр?

**Мінәжат:** Иса Мәсіх, Сен қазір аспандасың және бізді көріп, мінәжатымызды естисің. Мені соншалық сүйгенің үшін және түбінде Өзіңмен мәңгіге бірге болатыным үшін алғыс айтамын. Сенің еркің бойыңша өмір сүруіме көмектес. Аумин.

## 24. Иса тағы бір рет келеді

Иса жерге тағы бір рет келеді. Біз мұның қашан болатынын білмейміз, бірақ, осы келгенінде балаларын Өзімен бірге алып кететінін білеміз. Бұл өте бір керемет күн болады! Біз ақыры Өзіміздің Тәңіріміз – Иса Мәсіхті көретін боламыз. Біз әрқашан күтіп жүрсін деп, Ол Өзінің қашан келетінін айтқан жоқ. Тағы да Ол біздің ұдайы жақсы өмір сүруге талпынғанымызды қалайды. Егер Иса Өзінің дәл қай кезде келетінін айтқан болса, онда біз күн сайын Оның еркін орындауға аса талпынбай, бәрін соңғы



күнге қалдырып қоятын едік. Сөйтіп, Мәсіх келердің алдында ғана Оған ұнамды, үлгілі өмір сүрейік деп шешсек, онда тым кеш қалар едік.

Сондықтан Иса Мәсіх бізге Өзінің қашан келетінін айтқан жоқ.

Біз Оның қалай келетінін де жақсы білмейміз. Әйтсе де, Құдай Сөзінде Мәсіхтің қалай келетіні туралы жеткілікті айтылған. Киелі кітаптан біз Исаның бізді Өзіне алып кету үшін және жаңа аспан мен жаңа жерді жарату үшін келетіні жайлы оқимыз. Біз тіршілік етіп жатқан жер мен айналамыздағы көріп жүргендеріміздің бәрі бір күні өзінің тіршілік етуін тоқтатады. Құдай бәрін жаңадан жасайды. Сонда қорқыныш та, күнә да болмайды. Иса қайта келгенде бәрінің қалай өзгеретінін көз алдыға елестетуге талпынудың да қажеті жоқ. Қазір біз үшін Оның келуіне дайын болатындай өмір сүруіміз маңызды.

Сен Иса Мәсіхті көргің келе ме? Өзіңді құтқару үшін өмірін қиған Оның алдында басыңды иіп, тағзым ете аласың. Ол кез келген сәтте келіп, сені мәңгіге Өзіне алып кете алады.

**Оқу үшін:** 1 Салониқалықтарға 4:13–18; 5:1–6

**Сұрақтар:** Иса тағы да қашан келеді?

Біз үшін Иса Мәсіхтің кез келген уақытта келетінін білудің маңызы неде?

**Мінәжат:** Иеміз Иса, Сенің жерге тағы да келетінің үшін алғыс айтамын. Күн сайын Өзің туралы ойлап, Сенің келуіңе дайын болуыма көмектес. Амин.

## 25. Киелі Рух

Жоғарыда біз бір ғана Құдай барын, бірақ Оның үш Тұлғадан тұратынын айттық. Киелі Рух – осы Тұлғалардың бірі. Біз Оны: Киелі Рух Құдай деп атаймыз. Бұған қоса, біз Құдай Әке және Құдай Ұл туралы да айтамыз.

Киелі Рух әрқашан болған. Бүкіл әлемді жаратуға Құдайдың үш Тұлғасы да қатысты.

Құрбан боларынан аз уақыт бұрын Иса шәкірттеріне Өзінің Көктегі Әкесіне қайтып оралатынын айтты және оларға Киелі Рухты жіберуге уәде етті. Исаның көкке көтеріліп кеткеніне он күн болғанда, Киелі Рух Оның шәкірттерінің жүректеріне келіп ұялады. Бірде, шәкірттер мінәжат етіп отырған кезде қатты дауыл тұрғандай шу көтерілді. Бір-біріне таңдана қараған олар әрқайсысының төбесінде от алаулап тұрғанын көрді. Бұл – Иса Мәсіх жіберген Киелі Рух еді. Әлгі алау тез жоғалып кетті де, Киелі Рух шәкірттердің жүректерінде орнығып қалды. Енді шәкірттер кез келген тілде сөйлей алатын болды. Олардың кейбірі, тіпті, ауруларды сауықтыратын және өлгендерді қайта тірілтетін қасиетке ие болды. Киелі Рух сенушілерді бақытқа бөледі және оларды қудалап, Мәсіхті уағыздағаны үшін таяққа жыққан кездің өзінде ән айтып жүретіндей күш-қуат берді.

Иса Мәсіхті қабылдаған әркімнің жүрегіне Киелі Рух қонып, оның Мәсіх үшін өмір сүруіне көмектеседі. Егер де шынайы мәсіхші болсаң, Ол сенің де жүрегіңде бар. Барлық жақсы ойлар мен тілектер тек Сол арқылы келеді. Киелі Рух сенің Құдайға сенім артуыңа және Оған мойынсұнып өмір

сүруіңе көмектеседі. Сондай-ақ, Ол сенің қуанышты, әрі адал болуыңа да көмектеседі. Сондықтан да сен өз жүрегіңде сүйіспеншілікті, қуаныш пен бақытты сезіне аласың. Сенің жүрегің Оның мекені болады.

Киелі Рух мәсіхшілердің ғана жүректерінде емес, сонымен бірге бір мезгілде барлық жерде де болады. Кейбір нәрселер туралы Құдаймен қалай сөйлесуді сен үнемі біле бермейсің, сол кезде Киелі Рух көмекке келіп, барлық ойыңды ретке келтіреді және айта алмай тұрған дұғанды Құдайға жеткізуге көмектеседі. Оның Өзі Құдай болғандықтан, Киелі Рухтың біз арқылы айтқан мінәжатын Құдай міндетті түрде естіп, оған жауап береді. Сенің мінәжатыңның Құдайға жетуіне Оның Өзінің көмектесуі ғажап емес пе?

Киелі Рух тек саған ғана көмектесіп қоймайды. Ол әлі Мәсіх жолына түспеген адамдарға да көмектесіп, олардың бойында Құдай сүйіспеншілігіне деген қажеттілікті оятады. Киелі Рух оларға Исаның өздері үшін істегендерін түсінулеріне көмектеседі.

Киелі Рух саған Құдай Сөзін оқығанда оны дұрыс түсінуіңе де көмектеседі. Егер сен әлі көп нәрсені жақсы түсінбейтін болсаң, онда Құдайға мінәжат етіп, оларды ашып беруін өтін.

**Оқу үшін:** Жохан 16:7–15

**Сұрақтар:** Киелі Рух дегеніміз Кім?

Ол қай жерде болады?

Ол істейтін бірнеше істі атап айт.

Киелі Рухтың өзімізге көмектесуіне кедергі жасай аламыз ба? Қалай?



**Мінәжат:** Жаратушы Ием, бізге Киелі Рухты жіберіп, келелі мәселелерімізді шешуге көмектескенің үшін рахмет айтамын. Киелі Рух менің жүрегімде әрекет ете алатындай етіп өмір сүруіме көмектес. Амин.

## **26. Мәсіхшілердің теріс қылықтар жасауға құқы бар ма?**

Біз өзіміздің ешқашан мәңгілік өмірді мұраға ала алатындай дәрежеде жақсы бола алмайтынымызды білдік. Біз тек Иса Мәсіхтің өлімі мен Оның қайта тірілуі арқылы ғана құтқарыла аламыз. Бұл, онда біз не істей берсек те болады дегенді білдіре ме? Ойланып көрейікші: біз Мәсіхтен өзіміздің Құтқарушымыз болуын өтінгеннен кейін ғана мәсіхшілерге айналдық; бұдан соң қалайша күнә жасаймыз?

Құдай жүрегімізге енген кезде, біздің жақсы болуымызға көмектесуді қалайды. Осы жерде амалсыздан мынадай сұрақ туындайды: осының бәріне қарамастан, біз неліктен жиі қателіктер жасаймыз?

Мұны шайтан істейді. Ол өте күшті; ол, тіпті, ең мықты деген періштелердің өзінен басым түседі. Ол бізді қалай алдауды және жүрегімізде жаман тілектерді қалай оятуды біледі. Аспанға барған кезімізде Құдай бізге жаңа жүрек береді – ол жүректе ешқашан да жаман ойлар болмайды.

Ал жердегі өмірде, біз күнә жасауға бейімбіз. Жүрегімізге орныққан сәттен бастап, Құдай біздің күнәмен күресуімізге көмектеседі. Бірақ, біз Исадан үнемі өмірімізді Өз қолына алып, шайтанды қуып шығуын сұрап отыруымыз керек.

Біздің жаңа жүрекке ие болған сәтіміз қандай

тамаша болады десеңші! Сонда бізді ештеңе де жамандыққа итермелеп, ашуымызды қоздырмайтын болады.

Иса Мәсіхтің шайтаннан әлдеқайда күшті екенін және шайтанның Одан қатты қорқатынын ешқашан да есіңнен шығарма. Біз Исаны көмекке шақырған кезде, шайтан қашып кетеді.

**Оқу үшін:** Рим. 6:1–10

**Сұрақтар:** Шайтанның не істегісі келеді?

Сен шайтаннан күштісің бе?

Шайтаннан кім күшті?

Шайтанның бізді күнәға итермелеуіне қалай қарсы тұра аламыз?

**Мінәжат:** Иеміз Иса Мәсіх, мен Саған бәрінен, тіпті, шайтаннан да күшті болғаның үшін алғыс айтамын. Жүрегімді Өзің үшін таза ұстауға көмектес. Аумин.

## 27. Сенің жүрегіңнің тағында кім отыр?

Сен тақтың не екенін білесің бе? Ол – патша отыратын тамаша орындық, патша елін сол жерде отырып басқарады.

Сен өз жүрегіңде де тақ барын және онда да біреудің отырғанын білесің бе? Ол жерде сенің өзің отырмаған боларсың деп үміттенемін. Әрине, қазір мен нағыз тақ туралы айтып тұрған жоқпын. Біздің жүрегімізде де нағыз патша бар, ол Құдай балаларына ненің бұрыс, ненің дұрыс болатынын білдіріп тұрады. Ол Патша деп отырғанымыз – Иса Мәсіх.

Бірақ осы таққа отырып алып, бізге билігін жүргізгісі келетін тағы екеу бар. Оның бірі – шайтан, ал екіншісі – өзіңдегі «мен» деген өркөкіректік. Егер Иса бір нәрсені талап еткенде, сен оны басқаша істейтін болсаң, онда бұл кезде сенің жүрегіңнің тағында Иса Мәсіх емес, басқа біреудің отырғаны. Яғни, бұл жүрегіңдегі Исаны отыруға тиісті тағынан қуып шыққаның. Өзіңе-өзіңнің патша болғың келгені. Егер сен бұлай істесең, шайтан қуанып қалады. Сенің жүрегіңдегі тақта Иса отырмаса, шайтан сені түрлі күнәға итермелейді. Егер сенің жүрегіңде Құдай отырмаса, бұлай істеу – шайтан үшін түк те емес.

Өз жүрегіңдегі тақта өміріңнің патшасы болып өзің отырсаң, онда шайтан жүрегіңнің үйіне еш кедергісіз кіріп алады да, оның астан-кестеңін шығарады. Ол өзінің сенен күшті екенін біледі, сондықтан да ол саған күле қарайды, себебі сен өзіңді басқармайсың, шын мәнінде сені ол басқарып отыр. Ол сенімен ойына келгенін істей алады.

Ал егер сенің тағыңда Құдай отырса, онда шайтанның жаман бір нәрсе істеуге батылы бармайды. Ол қашан сен өзім патша боламын деп шешім қабылдағанша тығылып, күтіп отырады.

Біздің Құдайымыз өте шыдамды, мейірімді және ұлы. Ол сенің тағыңа өзің сұраған жағдайда ғана отырады. Сен мәсіхші ретінде Оған тағыңнан үнемі орын беруге тиіссің. Құдайдан бұл туралы сұрасаң, Ол саған көмектеседі. Киелі Рух бұл жайлы үнемі сенің есіңе салады.

Сенің өміріңнің патшасы кім? Сенің жүрегіңнің тағында кім отыр? Құдай отыр ма, әлде, онда өзің отырып, өміріңді шайтанға билетесің бе?



**Оқу үшін:** Рим. 6:14–23

**Сұрақтар:** Жүрегіңнің тағына кім отырғысы келеді?

Егер тақта Құдай отырса, шайтан не істейді?

**Мінәжат:** Құдіреті күшті Құдай, біздің аспандағы Әкеміз! Шайтан мені күнәға батырмас үшін Иса Мәсіхті жүрегімнің тағына отырғызуыңды сұраймын. Исаның шайтаннан күшті болғаны үшін Саған алғысымды айтамын. Аумин.

## **28. Сенің жүрегіңнің тағында әрқашан патша болуы керек**

Сенің жүрегіңнің тағы туралы айтқанымыз есінде ме? Ол тақта салтанатпен отырғысы келетін үш патша барын да айтқанбыз. Оның бірі – нағыз Патша – Иса Мәсіх, ал қалған екеуі – шайтан және сенің бойыңдағы «мен». Өз тағыңа өзің ие болған кезде, шайтан сенің жүрегіңе енеді де, істегендеріңнің бәрі теріс болып шығады. Ал егер сенің тағыңда Иса Мәсіх отырса, онда шайтанның тығылуына тура келеді. Онда сен қуанышты және көңілді күйде боласың. Сенің істеген жақсы істеріңе Иса да, ата-анаң да қуанады. Жүрегіңде Құдай патша болып тұрған кезде бәрі де дұрыс болады, ал сен өз қалауыңмен әрекет ете бастадың болды, бәрі керісінше болып шығады.

Құдай біз үшін бәрін жасағаннан кейін, Оған өз өмірімізді өзіміз басқарайық дегеніміз жөнсіз емес пе? Әрине, солай, бірақ біз бұған қарамастан өз дегенімізді істейміз.

Жүрегіміздің тағында тек Исаның патшалық етуі үшін не істеуіміз керек? Құдайды жете білуге тырыс, сонда сен Оны шын жүрегіңмен сүйіп, өз жүрегіңде тек Соның ғана билік етуін қалайтын боласың.

Біз Құдайды неғұрлым жетік білген сайын, Оны соғұрлым жақсы көре түсеміз және өз өмірімізді Оның қолына сеніп тапсырамыз. Құдайды неғұрлым жақын танысақ, соғұрлым Оған деген сеніміміз нығаяды және жүрегіміздің тағында тек Ол отырсын деген тілегіміз күшейе түседі.

Біз жүрегімізден екі түрлі үнді жиі естиміз. Оның бірі: «Бұлай істеуге болмайды» десе, екіншісі: «Онда тұрған ештеңе жоқ, солай істей бер» деп тұрады. Бұлардың қайсысы – Киелі Рухтың дауысы, ал қайсысы – шайтандікі екенін қалай білуге болады? Кішкентай нәресте өз анасының дауысын өзге дауыстардан өте ерте ажыратады, ал өскен сайын оның дауысын көптеген дауыстардың ішінен айнытпай таниды. Біз де Киелі Рухтың дауысына осылай үйреніп, оны шайтанның дауысынан ажырата аламыз.

Бұған қалай үйренуге болатынын білесің бе? Онымен сөйлесіп үйрену керек. Адамдарды жақын танудың ең жақсы тәсілі: онымен әңгімелесу. Бірақ біз Құдайды көре алмаймыз ғой, сонда Онымен қалай сөйлесеміз? Біз Онымен мінәжат арқылы сөйлесеміз. Ол біздің айтқанымызды әрқашан естиді, тіпті, біздің өте ақырын, өзге адамдар ести алмайтын дауысымызды да естиді.

Құдайды жақын танудың тағы бір тәсілі: Оның бізге айтқысы келетініне мұқият құлақ түру. Құдай бізбен қалай сөйлеседі? Ол бізбен Киелі кітапты

оқыған кезімізде сөйлеседі. Киелі кітап Оның Сөзі болып табылатындықтан, біз Құдайдың өзімізбен сөйлесіп тұрғанын естиміз. Біз Оның не айтқысы келіп тұрғанын үнемі түсіне бермейміз, бірақ, бізге бәрін түсіну міндетті емес. Біз Киелі кітаптан оқығанымыз туралы ойланып қалсақ, Киелі Рух біздің Құдайды жақынырақ тануымызға дереу көмектеседі.

**Оқу үшін:** 12:1–3

**Сұрақтар:** Сенің жүрегіңде бір мезгілде қанша патша билік жүргізе алады?  
Құдайды жақынырақ білу бізге не үшін қажет?  
Құдайды қалай жақынырақ біле аламыз?

**Мінәжат:** Жаратқан Ие, Сені жақынырақ білгім келеді. Өзіңмен мінәжат арқылы сөйлесе алатыныма қуаныштымын. Сені бұдан артық жақсы көріп, сенім артуым үшін Өзіңді жақынырақ тануыма көмектес. Аумин.

## 29. Жеміс беру

Бір бала әкесімен қыдырып жүріп, ағаштың астында жатқан құраған бұтаны көрді.

– Әке, мына құрғақ ағашқа қара! – деді ол қуанып.  
– Мен оны үйге апарып отырғызамын: мүмкін, жапырақтар өсіп шығар, тіпті, алма беруі де мүмкін ғой!

– Жоқ! – деді әкесі, – бұл құрап қалған бұтақ. Ол енді ешқашан жапырақ жаймайды және алма да бермейді.



– Ол қайтадан жеміс беру үшін ештеңе жасай алмаймыз ба? – деп сұрады бала.

– Жоқ, ол өліп қалған. Мұның жалғыз ғана амалы бар, егер оған Құдай жаңа өмір берсе, ол қайта көгереді.

Біз де осы бұтақ секілді өліміз, ал Иса – өмір ағашы. Біз өзімізге көмектесе алмадық; сондықтан Құдай қураған бұтақ секілді бізді алды да, тірілтіп, ағашқа апарып будандастырды. Енді біз қуаныш, сүйіспеншілік, төзімділік секілді жемістерді бере аламыз.

Біз Мәсіхке деген сүйіспеншілігіміз арқылы қайырымды істер жасаймыз. Біз жаңағы қураған бұта секілді едік, бірақ Құдай бізге жаңа өмір сыйлады.

**Оқу үшін:** Жохан 15:1–8

**Сұрақтар:** Қураған бұтаққа жеміс өсе ме?

Киелі кітап күнәһарлар өз күнәларының кесірінен өлі дейді. Олар неліктен қурап қалған бұтаға ұқсайды?

Адамдарды құтқару үшін Құдай не істеді?

**Мінәжат:** Аспандағы Әкеміз! Күнәмнан ажыратушы – Құтқарушының керек екенін білемін. Мені құтқару үшін Иса Мәсіхті жіберіп, жаңа өмір сыйлағаныңа алғыс айтамын. Жақсы жеміс беруіме көмектес. Амин.

### 30. Адамның Құдайды жақсы көретінін қалай білуге болады?

Сірә, сен де әлдекімдер туралы: «Олар Құдайды шын жақсы көре ме екен?» деп ойланған боларсың? Мұны сұрамай-ақ білуге болады. Иса Мәсіхтің Өзі берген үлгісі бар, біз соған қарап Оны қаншалықты сүйетінімізді біле аламыз. Ол мұны біздің істеген істерімізге қарап білуге болады деген. Құдайды сүйеміз дейтін және Оны қуанту үшін бар күштерін салатын адамдар туралы: олар шынымен де Құдайды сүйеді деп айтуға болады. Мәсіхті жақсы көретіндері жайлы айтқандарымен, Оның өздерінен күткенін істемейтін адамдар да бар, олар Құдайды сүймейді.

Біздің Құдайға деген сүйіспеншілігіміз неден көрінеді? Біріншіден, біз адамдардың бәрін жақсы көріп, оларға қайырымды болуымыз керек. Біз бұған күнделікті ата-анамызды сыйлап, олардың айтқандарын екі етпей орындау арқылы жаттығамыз.

Мысалы, біз іні-қарындастарымызға қамқор болып өз ойыншықтарымызбен ойнауларына рұқсат етеміз немесе мектептегі достарымызға қандай да бір көмегімізді тигізе аламыз. Кімге қайырым жасау керектігін ешкім айтпай-ақ, өзің де біле аласың.

Ал егер сен өзгелерге қайырымсыз болсаң, онда сен өзіңді Иса Мәсіхтен артық көргенің. Егер де сен Исаны шын жақсы көрген болсаң, онда қандай жағдайда болмасын, Оның еркін орындауға тырысасың.

Әрине, бұл оңай емес. Бұған жаттығу қажет. Пианинода ойнап немесе суда жүзіп үйрену үшін

қанша жаттығу керек екенін білесің бе? Мойынсұнып үйрену үшін де дәл осылай жаттығу қажет. Сонда бір-бірімізге қайырымды болуға үйренеміз. Егер саған біреу жекіп сөйлесе, ең оңайы – оған да дәрекілікпен жауап қайтару. Бірақ, біз айқайға айқаймен емес, кішіпейілділікпен жауап беріп үйренуіміз керек. Киелі кітапта мәсіхшілердің ерекше қасиеті – олардың өзгелерге деген сүйіспеншілігі, – делінген. Сондықтан, адамның істеген қылығына қарап, оның Құдайды қаншалықты сүйетінін білуге болады.

Егер де біздің өзіміз қайырымсыз болсақ, онда өзгелердің Иса Мәсіхті жақсы көруге деген тілектері қалай оянбақ?

**Оқу үшін:** 1Жохан 2:3–14

**Сұрақтар:** Адамның Құдайды сүйетінін қалай білуге болады?

Қалай қайырымды болуға болады?

Пианинода ойнап немесе жүзіп үйренгің келсе, жаттығу қажет пе?

Қайырымды болу үшін жаттығу қажет пе?

Өзіңе жаулық көзқараспен қараған адаммен не істеуге болады?

**Мінәжат:** Иса Тәңірім, Сен маған мейірімің мен шексіз сүйіспеншілігіңді көрсетіп, мәңгілік өлімнен құтқарып алдың. Енді менің де өзгелерге мейірімді болуыма көмектесуіңді сұраймын. Басқа адамдар да Саған бала бола алулары үшін, Сенің сүйіспеншілігің менен көрініп тұрсын. Аумин.



### 31. Құдай балалары күнә жасаған кезде не болады?

Құдайды сүйетінің қарамастан, Оны ренжітіп алғаныңды сезінген кезде не істеу керек? Иса біздің Құдайымызға айналған сәттен бастап, қиындықтарымыздың бәрі бірден жойылып кетеді деп ойлауға болмайды. Шайтан бізді жамандыққа итермелеуін жалғастыра береді. Егер, біз өте мұқият болмасақ, кейде ол бұл мақсатына жетеді де.

Енді не істеуіміз керек? Бұған Киелі кітап жауап береді: біз Исаның алдында өз күнәларымызды мойындауымыз керек, сонда Ол бізді кешіріп, Құдаймен жақсы қарым-қатынасымыз қайта қалпына келеді. Болашақта күнәға бармауымыз үшін, кейде Исаның бізді жазалауына тура келеді. Мысалы, Ол бұрын бізге қуана беріп жүрген нәрселерді беруден бас тартады.

Бірақ, біз әрқашан Исаға келіп жасаған күнәларымызды мойындап, Оның кешіргені үшін алғысымызды білдірсек, онда Исаның өзімізге деген сүйіспеншілігін қайтасезіне аламыз. Бұл сенің әлдебір жаман қылығың үшін ата-анаңның жазалағанына ұқсайды. Мұндай сәттерде сен де, ата-анаң да қамығып қаласыңдар. Бірақ, бәрі реттелген соң, сендердің жүректерің қайтадан қуанышқа кенеледі.

Бірде-бір адам күнәні кешіре алмайды. Бұл тек Құдайдың ғана қолынан келеді. Құдайдың айтуы бойынша, біз Оған бара аламыз және баруға тиістіміз. Өз күнәміз үшін Оған басқа біреуді жібере алмаймыз, Құдай Өзінің алдына біздің өзіміздің барғанымызды қалайды.

**Оқу үшін:** 1Жохан 1:8 – 2:3

**Сұрақтар:** Күнә жасаған жағдайда, Құдай балаларының не істеуі керек? Кейде Құдай бізді қалай жазалайды? Ол бізді не үшін жазалайды?

**Мінәжат:** Аспандағы Әкем, күнәмнің кешірілетіні үшін Саған шексіз ризамын. Қандай да болмасын күнә жасасам, кешіресің, бірақ Өзіңнен кешірім сұрауды әрқашан ұмыттырма. Сенің маған деген осындай сүйіспеншілігің үшін алғысымды айтамын. Амин.

## 32. Біз неге кейде жазалануға тиіспіз?

Сен қалай ойлайсың, егер ата-анаң сені жазаласа, олар мұны қатігез болғандықтарынан істей ме? Әрине, олай емес! Керісінше, олар Құдайды тыңдайды, Оның құлақ аспайтындардың бәрі жазалануы керек деген сөзін орындайды. Киелі кітапта: жазалау бізге ұнамауы мүмкін, бірақ ол тәрбие үшін керек делінген. Балалар ата-аналарының айтқандарын тыңдауы керек, ал егер олай болмаса, ата-анасы оларды жазалауға тиіс.

Жазалау жақсы көмектеседі. Егер саған тағы жаман ой келетін болса, бұрынғы тартқан жазаң еріксіз есіңе түседі де, сен ол ойыңнан бас тартасың. Сондай-ақ, жазалау Құдайды неше рет ренжіткенімізді де есімізге салып отырады.

Егер жаман қылықтар жасаған балалар жазаланбаса не болар еді? Мұндай жағдайда балалар ата-анасын өздері қалаған кезде ғана тыңдайды; олар мұғалімдерін де тыңдамайтын болады, ал кей-

іннен мүлде заңға бағынбай кетеді. Ешқашан жаза тартпаған балалардан қауіпті қылмыскерлердің шығуы мүмкін, себебі олар өз беттерімен кеткен және басқалар туралы ештеңе ойламайды.

Көрдіңбе, әке-шешең сені жазалағанда ешқандай жаманшылық ойламайды. Олар өзгелердің игілігі туралы, олардың құқықтары мен Құдайдың сенен нені талап ететіні жайлы ойлауыңа көмектеседі. Құдай сенің тек өз еркінді орындағаныңды қаламайды. Жазалану сенің болашақ өміріңде көптеген қиындықтардан аулақ болуыңа көмектеседі.

Бірақ, бәрінен бұрын ата-ананы, ұстаздарды және өзге адамдарды тыңдап үйрену қажет. Егер біз оларды тыңдап үйренсек, онда Мәсіхке мойынсұнуымыз да оңай болады. Егер ата-аналарымыз бізді әлдебір қылықтарымыз үшін жазалайтын болса, олар бұл арқылы тек біздің Исаны бұрынғыдан да жақсы көріп, Оның еркін орындауға дайын болуымызға көмектеседі. Ата-анамызды тыңдау арқылы, біз Құдайға мойынсұнуды да үйренеміз.

Яғни, балаларын жазаламайтын ата-аналар оларға зиянын тигізеді. Сондықтан, келесі жолы ата-анаң жазалаған кезде ашуланба, оның орнына жазаның бұдан кейін мойынсұнып жүруіңе көмектесетіні туралы ойла.

Кімде-кімнің бау-бақшасы болса, сол үнемі сонда болып, арам шөптерді жұлу қажет екенін біледі, өйтпесе, еккен өнімді арамшөп басып кетеді.

Біздің жүректеріміз де осы бау-бақшаға ұқсайды. Сондықтан ата-аналарымыздың сол арам шөптерді дер кезінде жұлып тастауға көмектескені үшін алғысымызды айтуымыз керек.



**Оқу үшін:** Ефес. 6:1–9

**Сұрақтар:** Жаза неліктен біздің пайдамызға жарайды?

Балаларды жазаламаса не болады?

Сен қалай ойлайсың, егер сен ата-анаңды тыңдап үйренсең, Құдайды да тыңдайтын боласың ба?

**Мінәжат:** Құдіреті күшті Құдай, біздің Көктегі Әкеміз! Мен Сенің Әкем екенінді білемін, сондықтан да, егер кейде теріс қылықтар жасасам, мені жазалағаның дұрыс. Жасаған қатемді қайталамауыма көмектес. Мен мұны Исаның атынан сұраймын. Амин.

### 33. Құдайдың хаты

Әкеңнің шетелде жүргені туралы ойлашы: ол сенімен сөйлесе алар ма еді? Жоқ, ол өте алыста, сен оны көре алмас едің және телефон арқылы болмаса, оның дауысын да ести алмас едің. Бірақ, оның сенен нені қалайтынын білудің бір жолы бар. Оның саған хат жазуына болады.

Құдайдың өзіңмен сөйлескісі келгенін көз алдыңа елестетші. Егер бұл үшін Оның Өзі келетін болса, сен Оның құдіретіне шыдай алмас едің! Бірақ, Ол сенімен басқаша сөйлесе алады: Құдай саған ұзақ хат жолдады, сен сол хатты оқи отырып, Оның өзіңе не айтқысы келгенін біле аласың. Бұл хат – Киелі кітап. Ол Құдай туралы, Оның істеген істері мен сенен нені күтетіні туралы көптеген жайттарды баяндап береді. Сен Оның хатын оқыдың ба? Құдай бұл хатты

жазған кезде Оған қарындаштың да, қаламсаптың да, жазу машинкасының да қажеті болған жоқ. Ол Өзін шын жақсы көретін адамдарды таңдап алды да, оларға әр түрлі хаттарды жазғызды, Киелі кітап сол хаттардан құралды. Кейде, Құдай оларға көмектесу үшін аян беріп, болашақтың суреттерін көрсетті. Өлгі адамдар оларды суреттеп, қағазға түсіріп отырды. Содан соң Құдай сол жазылғандардың жоғалып кетпеуінің қамын жасады. Осылайша Киелі кітап біздің заманымызға дейін жетті.

Кейде ол адамдар өздерінің Құдайды қалай сүйетіндері және Ол туралы не ойлайтындары туралы жазды. Мысалы, Дәуіт патша біз Киелі кітаптан кездестіретін көптеген Забур жырларын жазды.

Тағы басқалары өздерінің және достарының бастарынан өткергендері жайлы баяндады. Мұны жазып отырғанда олар осыны жаздырып отырған Құдайдың Өзі екенін білген де жоқ.

Киелі кітап жазылғаннан бері қанша уақыт өткенін білесіңдер ме? 2000 жылдан астам уақыт өтті!

Осындай хат қалдырып, Құдай бізге ұлы жақсылық жасады. Соның арқасында біз Жұмақ, Иса және Оның бізге деген сүйіспеншілігі жайлы көп нәрселерді біле аламыз.

Егер досыңа хат жазып, ал ол оны бір рет те оқымаса, сен не ойлар едің? Менің ойымша, сен қатты ренжіп қаласың. Өзіңе арналған бұл хатты сен де оқымай қойғаныңды көрсе, әрине, Құдай да ренжиді. Сондықтан Киелі кітапты оқудың маңызы зор. Мүмкін, онда жазылғандардың көпшілігі сен

үшін түсініксіз болар, бірақ, сен бәрібір аздап болса да түсінесің, ал есейе келе, одан да көбірек түсіне бастайсың.

Егер сен денсаулығың мықты, әрі күшті боламын десең, онда тамақтанып, ішіп-жеуің керек. Ал егер Тәңірді біліп өскің келсе, онда Киелі кітапты да сол секілді оқып үйренуге тиіссің.

**Оқу үшін:** 2Тимоте 3:14–17; 4:1–2

**Сұрақтар:** Досыңмен сөйлеспей-ақ, оған бір нәрсені қалай айтуға болады? Өзінің Сөзі бізге жетуі үшін Құдай қандай жолды таңдап алды? Сен Құдайдың өзіңе жолдаған хатын оқисың ба?

**Мінәжат:** Біздің Көктегі Әкеміз, бізге жазған хатың – Киелі кітап үшін алғыс айтамын. Онда айтылғандардың бәрін орындауыма көмектес. Ол менің жолыма жарық болсын. Мен мұны Иса Мәсіхтің атынан сұраймын. Амин.

### **34. Киелі кітапта айтылғандардың дұрыс екенін сен қалай білесің?**

Бізге Құдай туралы айтатын болғандықтан, Киелі кітап әлемдегі ең маңызды Кітап болып табылады. Ол бізге өзге ешбір кітаптан таба алмайтын жайттар туралы айтады, мысалы: Құдайдың әлемді және алғашқы адамдарды қалай жаратқаны жайында. Мұның қалай болғанын ешкім көрген жоқ және оны көруге мүмкіндігі де болмады. Жаратылыс жайлы



Құдай Киелі кітап арқылы айтып бермегенде, біз ештеңені білмес едік.

Кейбір адамдар, егер біз әлемнің қалай жаралғанын өз көзімізбен көрмегеннен кейін, оның бәрін Құдай жаратқанын қалай білеміз дейді. Олар Киелі кітапта жазылғандарға сенбейді. Киелі кітапта жазылғандардың шындық екенін өзге адамдардың түсінулеріне қалай көмектесе аламыз?

Мысалы, мынандай фактілерге сүйенуге болады: Киелі кітапта көптеген оқиғалар ол оқиға болардан көп уақыт бұрын жазылған. Онда яһуди халқының Палестинадан қуылатыны және Құдайдың оны қайтадан сонда апаратыны айтылған. Мұның бәрі қазір, біздің заманымызда орындалып жатыр. Біз мұны өз көзімізбен көргендіктен, Киелі кітапта айтылғандардың шындық екеніне сенеміз. Немесе: Киелі кітапта бұдан көптеген ғасырлар бұрын өмір сүрген патшалардың есімдері аталады. Киелі кітапқа сенбейтін адамдар, мұндай патшалар болған емес, мұның бәрі ойдан шығарылған дейді. Бірақ, көптеген ғалымдар қазба жұмыстарының нәтижесінде осы патшалардың Киелі кітапта айтылғандай дәл сол заманда және сол елдерде өмір сүргенін дәлелдеді.

Киелі кітаптың ақиқаттығын дәлелдейтін тағы бір факт бар және бұл, сірә, ең сенімді дерек болар: онда біздің күнәларымыздың қалай кешірілетіні және өміріміздің өзгеретіні жайлы жазылған. Адамдар Құдайға бет бұрған кезде, олардың өмірлерінің қалай өзгеретінін өз көзімізбен көре аламыз. Бұл Киелі кітаптың ақиқаттығының айқын дәлелі болып табылады.

Сондықтан біздің өмірімізді Исаның басқаруы өте

маңызды, олай болмаған жағдайда, достарымыздың Киелі кітапта жазылғандардың шындық екендігіне сенулері қиын болады.

**Оқу үшін:** 2Петір 1:16–21

**Сұрақтар:** Әлемнің жаралғанын кім көрді? Мұның бәрінің қалай болғанын бізге айтып бере алатын Кім? Құдай бұл туралы қайда айтады? Киелі кітапта алдын ала жазылған бір оқиға туралы айтып бер.

**Мінәжат:** Көктегі Әкеміз, мен Сенің мәңгілік екенің үшін алғыс айтамын. Киелі кітапта жазылғанның бәрі шындық екеніне де ризамын. Маған оны оқып, дұрыс түсінуіме көмектес. Аумин.

### **35. Егер біз Киелі кітапты оқымасaq не болады?**

Киелі кітапты оқу және онда жазылғандарды орындау шын мәнінде соншалықты маңызды ма? Иә! Бірақ, Киелі кітапты оқудың және онда жазылғандарды орындаудың қажеті жоқ деп есептейтін адамдар да бар. Олар өздері білуге тиісті нәрсенің бәрін білеміз деп ойлайды. Олар Құдайды танып-білудің оңай емес екенін түсіне алмайды. Киелі кітапты оқымаса, Құдайдың күнәні жек көретінін олар қалай түсінеді? Олар Иса Мәсіхтің өз күнәлары үшін өлгенін Киелі кітапсыз біле ала ма?

Әрине, біз гүлдерге, ағаштарға, табиғатқа қарап Құдай жөнінде кейбір нәрселерді білуімізге болады.

Күн, ай мен жұлдыздар Оның қаншалықты ұлы және құдіретті екенін көрсетеді! Бірақ, Оның бізді қалай жақсы көретіні туралы тек Киелі кітаптан ғана біле аламыз.

Біз Киелі кітапты толықтай оқып, онда жазылғандардың бәрін орындауға тиіспіз. Киелі кітапты оқып отырған кезімізде, оның кейбір тараулары бұдан көп жылдар бұрын өмір сүрген адамдарға арналып жазылғанын байқаймыз. Мысалы, онда исаилдіктерге құрбандық шалу үшін, құрбандық шалатын орынды қалай салу керектігі жазылған. Құдай сол құрбандықтар арқылы олардың күнәларын кешіруді ойлаған. Қазір бізге құрбандық шалудың қажеті жоқ, себебі, Құдайдың құрбандық Тоқтысы – Иса Мәсіх барлығымыз үшін құрбан болып, айқыш ағашта өлді. Бізге енді басқа құрбандықтың қажеті жоқ. Киелі кітапта жазылғандардың кейбірін бүгінгі күндерде орындаудың қажеті болмаса да, оларды оқудың бәрібір пайдасы бар. Себебі, онда Құдайдың жоспарлары, Оның сүйіспеншілігі және Иса Мәсіх жайлы айтылған. Сондықтан, Киелі кітаптың барлық жері маңызды, оны оқып, үйрену керек.

Біз күнделікті өзімізден: бүгінгі оқығандарымыздан нені үйрене аламыз? – деп сұрауымыз керек. Екінші жағынан, кейбір оқығандарымыз жайында: «Мұның маған қатысы жоқ. Сірә, бұл басқа біреулерге арналып жазылған болар» деген ойдан абай болуға тиіспіз. Ал егер ол саған арналып жазылған болса, онда есінде болсын: оған ықыласың бар ма, жоқ па, – мәселе онда емес, сенің міндетің – Құдайдың өзіңе Киелі кітап арқылы айтқандарын орындау. Киелі кітапта жалғандық бар деп ойлама және онда



айтылғандардан бас тартпа! Біз Киелі кітаптың сөздеріне ештеңе қоспауымыз да, ештеңені алып тастамауымыз да керек.

**Оқу үшін:** Зәбүр 118:9–16

**Сұрақтар:** Біз Киелі кітапсыз да Құдай жайлы біле аламыз ба?

Құдайдың қандай ерекше қасиетін біз тек Киелі кітап арқылы ғана білеміз?

Киелі кітаптың құрбандықшалу туралы айтылған тұстарын орындауымыз керек пе?

Бұл аяттардың біз үшін қандай маңызы бар?

**Мінәжат:** Жаратушы Ием, мен Саған Қасиетті Сөзің – Киелі кітап үшін алғыс айтамын. Сенің Киелі кітапта күнәларың кешіріледі дегенің үшін рахмет. Маған Киелі кітапты күнделікті оқуға және өсиеттеріңді орындауға көмектес. Аумин.

## 36. Құдай менен не тілейді?

Құдай баласының ең басты міндеті – Оның тілін алу. Тек сонда ғана нағыз бақытты бола аласың.

Мүмкін, сен: «Құдайдың менен не тілейтінін қайдан білемін?» – деп таң қаларсың. Бұған жауап алу үшін, сен өзің осы жайлы Құдайдан сұрауың керек. Бірақ, Ол бұған жауап бере ме? Иә. Ол саған қуана жауап береді. Бәлкім, алғаш саған Құдайға сұрақ қою және Оның қайтарған жауабын есту қиын болып көрінер де. Сен әке-шешенді күнде көріп, олармен сөйлесе

аласың. Ал Құдайды біз көре де, ести де алмаймыз. Сонда, Оның бізден нені қалайтынын қалай білеміз?

Азырақ ойлансақ, бұл сұраққа жауап беру қиын емес. Мысалы, өте алыста тұратын адамдардан қалай хабар алуға болады? Олармен хат арқылы хабарласуға болатынын жоғарыда айтып кеттік. Келген хатты оқып, оны жазған адамның нені қалайтынын біле аласың.

Құдай бізге ұзақ хат жазды: ол – Киелі кітап. Егер біз оны оқи бастасақ, оның басқа хаттардан өзгеше екенін байқау қиын емес. Ол әдеттегі хаттардан ұзақ және олардан әлдеқайда қызықты. Онда Құдайдың бізден не күтетіні және Оның нені жек көретіні жайлы жазылған. Сондықтан да Киелі кітапты оқу біз үшін өте маңызды.

Құдай бізден не қалайтынын өзге жолдармен де білдіре алады. Ол біздің әділетті жолмен жүріп, ешқандай жамандық жасамағанымызды қалайды. Әдетте біз ненің жақсы, ал ненің жаман екенін өзіміз де білеміз.

Егер басымызға жаман ой келсе немесе жамандық жасасақ, онда өзімізді жабырқау, бақытсыз етіп сезіндіретін сезімді берген. Сонымен, егер сенің бір нәрсе істегің келіп, бірақ сол сәтте жүрегің тыншымай, мазасызданып тұрсаң, есінде болсын, бұл Құдайдың өзіңмен сөйлесіп, сені күнә жасаудан тоқтатқысы келгені. Бұл сезім – Құдайдың үні немесе ар-ождан.

Құдайдың бізден нені күтетінін және оны қалай орындауға болатынын білудің тағы бір жолы бар. Ол жайында ата-анаңнан немесе Мәсіхті шын сүйетін басқа да адамдардан сұрап білуіңе болады.

Егер сен шынайы мәсіхші болсаң және Құдайды шын сүйсең, Құдайға мойынсұнып, Оның өзіңнен күткендерін істеуге даяр болсаң, онда, сөз жоқ, Құдай саған Өз еркін білдіреді.

**Оқу үшін:** Жар. баст. 24:34–48

**Сұрақтар:** Құдайдан қандай сұраққа жауап алғың келеді?

Саған жауап беру үшін, Құдай періштелердің көмегіне жүгіне ме?

Құдайдың сенен не тілейтінін білдіретін бірнеше тәсілін ата.

Біздің мінежатымызды Құдай әрқашан ести ме?

**Мінежат:** Құдіреті күшті Құдай, өзінің бар үмітін Иса Мәсіхке артқан адамдардың Әкесі! Біздің барлық сұрақтарымызға жауап беретінің үшін Саған рахмет айтамын. Өзіңнің менен не тілейтініңді түсінуіме көмектескенің үшін рахмет. Балаларыңа Өзіңнің еркінді орындауға көмектес. Аумин.

### **37. Неге мәсіхшілер әрқашан бірлікте болмайды?**

Бірде анасы екі ұлына: «Мен бақшаға барайын, ал сендер дүкенге барып, нан сатып әкеліңдер», – деді. Балалар сөзге келместен велосипедтеріне отырып, дүкенге қарай зымырады. Бірақ, олар нан сатып алар кезде қандай нан аларларын білмей, көп дауласты. Бірі – шешем ақ нанды, ал екіншісі – қара нанды жақсы көреді деді. Олардың бұлай



қызыл кеңірдек болғанын көрген адамдар бастарын шайқасты.

Киелі кітаптың кей тұстарын оқығанда да осындай пікірталастар болады. Мысалы, Киелі кітаптан біз мәсіхшілер шомылдыру рәсімінен өтуі тиіс деп оқимыз. Бірақ, шомылдыру рәсімі дегеніміз не? Көптеген мәсіхшілер бұл туралы әр түрлі пікірлерді ұстанады. Олардың кейбіреулері – баланы кішкентай кезінде шомылдыру рәсімінен өткізу керек деп ойласа, екіншілері – Иса Мәсіхті өзінің жеке Құтқарушысы ретінде таныған ересек адамдарды ғана шомылдыру керек деп есептейді. Біреулер – шомылдыру рәсімін өткізген кезде суды басынан құю керек десе, екіншілері – оны суға толық түсіру керек дейді.

Нан ұзу рәсімі жөнінде де пікірлер әр түрлі.

Сондықтан да, пікірлері әр түрлі адамдар әр басқа қауымдарға барады. Олардың біреулері өздерін – баптистерміз десе, екіншілері – лютеран немесе католик деп санайды. Олардан басқа да көптеген діни ағымдар бар.

Бірақ, қауымдар әр түрлі болғанымен, олардың ортақ бір мүддесі бар: өздерін мәсіхшілер деп атайтындардың бәрі біздің күнәмізді кешіретін және құтқаратын – тек Иса Мәсіх қана деп сенеді. Бұл ең бастысы.

Сонымен, барлық қауымдарда пікірлері әр түрлі болғанына қарамастан, Құдайды сүйетін және Оған шын ниеттерімен үміт артатын адамдар бар.

Сондай-ақ, Киелі кітапқа сенбейтін және онда айтылғандарды орындамайтын, сонымен бірге жоғарыда аталған маңызды мәселелерде басқа

мәсіхшілерге қосылмайтын қауымдар да бар. Әрине, бұлар ақиқат жолымен жүретін қауымдар емес. Ондай қауымға баратындардың көпшілігі – мәсіхші емес, олар, тіпті, Исаның өздері үшін өлгенін білмейді де.

Иса Мәсіхті уағыздайтын, ақиқат жолындағы қауымдарға баратындардың арасында өздерін мәсіхшіміз деп санағанымен, шын мәнінде Мәсіх жолымен жүрмейтін адамдар да кездеседі. Олар Иса Мәсіхтің өлімі өздері үшін нені білдіретінін түсінбейді. Олар қауымға бір кездері ата-аналары барғаны үшін ғана барады және жұмаққа бару үшін осының өзі жеткілікті деп есептейді. Біз мұндай адамдар үшін сиынып, Құдайдың жоспарын түсінулеріне көмектесуін сұрауымыз қажет.

**Оқу үшін:** Рим. 14:1–13

**Сұрақтар:** Жоғарыдағы әңгімемізде балалар не үшін таласты?

Мәсіхшілердің әр түрлі пікірде болатыны туралы бірнеше мысал келтір.

Қандай маңызды мәселеде мәсіхшілердің пікірлері ортақ?

Кімді шынайы мәсіхші деп атауға болады?

**Мінәжат:** Құдіреті күшті Құдай, Өзіңе сиынып жүрген тіл алғыш адамдарға деген мейіріміңнің молдығы үшін алғыс айтамын. Маған Өзіңнің Сөзіңді түсінуге және басқа пікірдегі мәсіхшілерге төзімді болуға көмектес. Амин.

### 38. Кешіру дегеніміз не?

Иса бізді ренжітетін немесе жек көретін адамдарды кешіруге үйретеді. Кешіру дегеніміз – өзіңе жамандық жасаған немесе әділетсіздік істеген адамға кек сақтамау. Киелі кітапта өзімізге жамандық жасаған адамдарды кешіру туралы көп айтылады.

Жауларымызға қалай қарауымыз керектігін Иса Мәсіх бізге Өз үлгісімен көрсетті.

Бірде бір уағызшы көшеде Иса туралы уағыз айтып тұрды. Кенет бір адам оның артынан ақырын жақындап келді де, оны ұрып жіберді. Тыңдап тұрғандар бұған наразы болып, әлгі адамды полицияға ұстап бермек болды. Осы кезде уағызшы:

– Керегі жоқ! – деп дауыстады.

Адамдар қатты таңданды:

– Ол сізге қастық жасады ғой, сол үшін жазасын тартуы керек.

– Жоқ! – деді уағызшы, – мен айтып жүрген Иса маған ренжіткен адамдарға кешірімді болуым керектігін үйреткен.

Содан соң ол әлгі адамға бұрылды да:

– Мен сізді кешірдім, бірақ есіңізде болсын, бұл үшін маған емес, Иса Мәсіхке қарыздарсыз, – деді.

Мұны естігендер өз құлақтарына өздері сенбеді. Олар Исаны керемет Адам болар деп ойлады және Ол туралы көбірек білгілері келе түсті.

Ал егер уағызшы әлгі адаммен айқайласа кетсе не болар еді? Жиналған жұрт оның сөздерін одан әрі тыңдамас еді. Егер ол әлгімен керілдесе кетсе, онда жиналғандар мәсіхшілер мен басқа адамдардың



арасында көп айырмашылық жоқ екен деп ойлаған болар еді.

Егер сені біреу ренжітсе, өзіңнің не істеуің керектігін білесің бе? Өкпелеу немесе ашулану оңай, бірақ Мәсіх сенің өкпең мен ашуыңды басуыңа көмектеседі. Осыған Исадан қуат алған біз Онымен мәңгі бірге болатынымызға қуанамыз. Ол бізді шыдамдылыққа үйретеді, соның арқасында біз өзімізді ренжіткен, бірақ Иса оларды да біз секілді жақсы көретін адамдарға кешірімді бола аламыз.

**Оқу үшін:** Матай 18:21–35

**Сұрақтар:** Өзіңді ренжіткен адамға не істейсің? Біз кешірген кезімізде, жүрегімізде кек алу тілегі қала ма?

Өзімізді ренжіткендерді қанша рет кешіруіміз керек?

**Мінәжат:** Аспандағы Әкеміз, Саған күнәларымды кешіргенің үшін алғыс айтамын. Сен маған көп нәрсені кешірдің! Маған өзімді ренжіткендерді кешіруге, оларды жақсы көруіме және оларға Өзің туралы айтуыма көмектес. Амин.

### 39. Сенің сыйлығың

Исаның саған сыйлық даярлап қойғанын естіп пе едің? Ол қандай сыйлық? Ол жөнінде менен сұрама, мен білмеймін. Бұл – саған тосын сыйлық болсын.

Ұдайы күнәға батып, жамандықтар жасайтындығымыздан, біз ол сыйлықты ала алмаймыз. Бірақ, Иса Мәсіх ол сыйлықты алу құқын жеңіп алды,

енді Иса оны бізбен бөліскісі келеді. Ол бізден бір ғана нәрсені күтеді: біз өз өмірімізбен Оған қаншалықты риза екенімізді көрсетуге тиіспіз. Біз бұл ризашылығымызды жер бетінде жасаған игілікті істеріміз арқылы көрсете аламыз.

Сондықтан, біздің қалай өмір сүретініміз өте маңызды. Біз жер бетінде аз ғана уақыт өмір сүреміз. Осы 60-70 жыл біз үшін көп болып көрінуі мүмкін, бірақ бұл мәңгілік өмірмен салыстырғанда түк те емес. Ал біз Құдай балаларының мәңгі өмір сүретінін білеміз. Бізді күтіп тұрған басты сыйлық – ол Мәсіхпен мәңгілік қарым-қатынаста болу. Мәңгілік өмірге барғанда, бұл сыйлықтан құр алақан қалу – үлкен өкініш. Бірақ, ол кезде бәрі кеш болады. Қазір уақыт бар. Сенің бар өмірің көз алдында және сен оны толықтай Мәсіхке арнай аласың. Өз өміріңді кішкентай кезіңнен бастап Құдайға арнасаң, күндердің күнінде үлкен бақытқа кенелесің.

Біз аспанға барғанда, Мәсіх біздің бар істеріміз жазылған кітапты ашады да, бізге не үшін және қандай сыйлық беру керектігін шешеді. Ол жерде көптеген күтпеген жәйттер болатынына сенуіңе болады. Құдай үшін көп нәрсе істедік деп есептеген адамдар өздеріне ештеңе жазылмағанын көреді, себебі, олар Құдайды шын сүймеген. Ал, ештеңені күтпеген кейбіреулер сыйлық алады. Біз өзімізді не күтіп тұрғанын білмейміз, бірақ, бізді құтқарғаны үшін, Мәсіхке деген өз алғыстарын игілікті істері арқылы көрсеткендерге өмір тәжінің берілетінін білеміз.

**Оқу үшін:** 3:11–17

**Сұрақтар:** Бізді қандай басты сыйлық күтіп тұр?  
Бұл сыйлықты кім береді?  
Бұл сыйлық кімге беріледі?  
Мәсіхтің сені құтқарғаны үшін, алғысыңды қалай білдіресің?

**Мінәжат:** Иеміз Иса, бізге аспанда сый дайындап қойғаның үшін алғыс айтамын. Өзіңді сүйеге, қайырымды болуға, Өзіңді мадақтап жүруге көмектес. Әрқашан адамдарды өз ісімен қуантуға, сол арқылы Өзіңді мадақтауыма күш бер. Аумин.

#### 40. Тәңір күні

Жексенбі – ерекше күн. Бұл күнді Құдай бізге әр түрлі шаруалардан босап, апта бойғы жұмыстан демалу үшін жаратты. Жексенбі күні бізге мектепке барудың қажеті жоқ. Ата-анамыз да бұл күні жұмысқа бармайды. Мұның орнына біз достарымызбен бірге қауымға барып, Құдайдың өзімізге жасаған барша жақсы істері үшін алғысымызды айта аламыз. Егер де жексенбілік жиналыстар болмағанда, Құдайды шын жүрегімізден мадақтауымыз едәуір қиынға түсер еді. Құдай біздің өзге мәсіхшілермен араласқанымызды және Өзін бірлесіп мадақтағанымызды қалайды. Бұл – біздің жексенбі күні жасай алатын ең жақсы ісіміз. Сондай-ақ, бұл күні ата-аналар да балаларына өзге күндерге қарағанда көбірек көңіл бөле алады.

Бұл күні біз Құдай туралы әдеттегіден көбірек ойланып, Оған қуана алғысымызды білдіруге тиіспіз. Егер біз жексенбі күні жұмыс істесек немесе күні



бойы футбол ойнасақ, мұны істеуіміз қиын болар еді. Киелі кітапта: «Құдай жетінші күнге оң батасын беріп, оны қасиетті деп белгіледі. Себебі Ол бұл күні Өзінің жарату жұмысының бәрін бітірген соң тынықты», – деп жазылған. Сондықтан яһуди халқы сенбі күні құрбандық шалып, ғибадатханада мерекелеген. Құдай Исраилге: «Демалыс күнін Маған бағыштап, берік ұстаныңдар!» – деп бұйырды. Ал мәсіхшілер Мәсіх қайта тірілген күн болғандықтан, сенбінің орнына жексенбі күнін мейрамдайды. Біз бұл күні бір жерге жиналып, Құдайды мадақтаймыз, өзгерлерге біздің күнәларымыз үшін өліп, мәңгілік өмір сыйлаған Иса Мәсіх туралы қуанышты хабарды жариялаймыз.

**Оқу үшін:** Ишая 58:13,14

**Сұрақтар:** Жексенбі күнгі ең жақсы іс не?

Жексенбі – аптаның біз Құдай туралы ойлап, Оған мінәжат етуге тиіс жалғыз күні ме?

Біздің жексенбі күні демалғанымызды Құдай не үшін қалайды?

**Мінәжат:** Көктегі Әкеміз, бізге жексенбі күнін сыйлағаныңа алғыс айтамын. Ол күнді баталы өткізуіме көмектес. Амин.

## 41. Сен Құдаймен татуластың ба?

Киелі кітапта «татуласу» – деген маңызды бір сөз бар. Саған осы сөздің мағынасын түсіндіргім келеді. Мысалы, әлдекім сенің ойыншығыңды сындырып қойса, сен, әрине, бұған қынжыласың немесе оны сындырған балаға ашуланасың. Бірақ, ол сенен кешірім сұрап, ойыншықты абайсызда сындырып алғанын айтса, сен оны кешіріп, еш ренішсіз онымен қайта ойнап кетесің. Әдетте, мұндай жағдайда: «Ойыншығыңды сындырған баламен татуластың ба?» – деп сұрайды.

Бірақ, сен кешіргеннен кейін де, әлгі бала саған өштігін қоймаса, бұл – түсініксіз нәрсе болар еді. Ол саған риза болып, қуануға тиіс емес пе? Бірақ, керісінше де болады: сен ол адамды кешіргеніңмен, ол бәрібір саған қырын қабақ көрсетеді.

Құдай мен Оған сенбейтін адамның арасындағы жағдай да осыған ұқсайды. Құдай адамға оның жаман істері үшін ашуланды. Содан соң Иса Мәсіх келіп, адамның күнәсі үшін өлді, соның арқасында Құдай адамды кешіріп, онымен татуласты.

Бірақ, адам Құдаймен татуласпаса, бұл – өте жаман. Құдай оны кешірем десе де, ол Құдайға мойынсұнбайды. Адамдар Құдаймен қарсыласып, өздерінің ойларына келгенін істеуді жалғастыруда.

Құдай ондай адамнан не күтеді? Адам өзінің қателігін мойындап, Құдайдан кешірім сұрауы тиіс. Егер осылай істесе, ол Құдаймен татуласқанын бірден байқайды. Құдай оны бұрыннан сүйетін, енді ол адам Құдайды сүйеді. Қандай қуаныш! Адам мен Құдай татуласты.

**Оқу үшін:** 1Қорынт. 5:17–21  
**Сұрақтар:** Татуласу деген сөз нені білдіреді?  
Құдай сенің күнәңді қашан кешіргісі келеді?  
Құдайдың бізді кешіруі үшін не істеуіміз керек?  
Сен Құдаймен татусың ба?

**Мінәжат:** Аспандағы Әкеміз! Сенімен араздықта өмір сүру қандай жаман. Сен маған әрқашан мейірімдісің. Сен мені қатты сүйесің, сондықтан маған да Өзіңді солай сүйуге көмектес. Мұны Сенен Иса Мәсіхтің атынан сұраймын. Амин.

## 42. Құдайға құлшылық ету туралы

Құдайға құлшылық ету жиналыстарына үнемі барып тұрудың маңызы неліктен аса зор? Себебі, Құдай біздің өзге мәсіхшілермен кездесіп, Құдайдың өзімізге істегендері туралы бөліскенімізді және Өзіне бірлесіп мінәжат еткенімізді қалайды. Егер біз Құдайға құлшылық ету жиындарына бармайтын болсақ, онда Құдайды сүйеуімізді әрі қарай жалғастыруымыз қиынға түседі. Құдай бізді қарым-қатынас жасауға мұқтаж етіп жаратты.

Есіңде болсын, егер сен Құдайға құлшылық ету жиналысына барсаң, онда сені Өзінің сүйіспеншілігі жайлы көбірек біле түссін және оны басқаларға да айтсын деп, Құдайдың Өзі жіберіп отыр. Сондықтан, сен онда айтылғандарды мұқият тыңдап, өзіңді ешкімге кедергі жасамайтындай ұстауың керек.

Жиналысқа Мәсіхті әлі білмейтін достарыңды



ерте барудың маңызы зор. Сенің Иса жайынан бейхабар достарың бар ма? Мүмкін, сен оларды Құдайға құлшылық ету жиынына шақырып көрерсің? Сонда олар да Құдайдың өздерін сүйетінін білер еді.

Кейде балаларға уағызшылардың сөзін тыңдап, ұзақ отыру қиынға түседі. Бірақ тыныш отырып, мұқият тыңдау өте маңызды. Кейде, уағызшының айтып тұрғандары саған түсініксіз болуы мүмкін. Ондай кезде тыныш отырып, естігенің жайлы мұқият ойлануыңа болады.

Егер сенбі күні ертең құлшылық ету жиналысына баратыныңды есіңе түсірсең, онда Құдайға Өзінің сөздерін жақсырақ түсінуіңе көмектесуін сұрап мінәжат ет. Осылайша, сен ол жерге жақсы дайындықпен барасың және тыныш отыруың қиынға түспейді.

**Оқу үшін:** Евр. 10:24,25

**Сұрақтар:** Құдайға құлшылық ету жиынына бару неліктен маңызды?

Жиналыстарға бару арқылы, сен өзге балаларға қалай көмектесе аласың?

Жексенбілік жиналыс туралы сенбіден бастап ойлаудың маңызы қандай?

Егер тыныш отыра алмайтын болсақ, жиналысқа баруымыз қажет пе?

**Мінәжат:** Аспандағы Әкеміз! Өзің жайлы әңгімелесе алатын өзге де мәсіхшілердің болғаны үшін алғысымды айтамын. Саған барлық уағыздаушылар үшін алғыс айтамын. Оларға батанды бер және келесі жексенбіге жақсы дайындалуларына көмектес. Онда айтылғандардың бәрін түсінуіме көмектес. Амин.

### 43. Ержеткенде кім болғың келеді?

Сен бұл жөнінде ойланып па едің? Өмірде мамандықтың көптігі сондай, мүмкін, сен олардың қайсысын таңдарыңды білмей жүрген боларсың? Дәрігер немесе инженер, механик немесе тігінші мамандықтарының бірін таңдап алуыңа болады. Бірақ, сенің кім болатыныңды әзірдің өзінде біліп отырған Біреу бар. Ол – Жаратқан Ие. Уақыты келгенде, Ол саған қандай мамандықтың лайықты болатынын айтып береді. Сондықтан, бұл жөнінде уайымдама!

Бірақ, Құдай мұны саған қалай айтады? Оның сенімен сөйлесуге көптеген мүмкіндіктері бар. Мысалы, Оның саған берген дарындары. Балалардың арасында тума шеберлер болады, сондай-ақ, шегені дұрыстап қаға алмайтын, бірақ, әнді жақсы айтатындар да бар, ал кейбірінің музыкаға мүлде икемі болмайды. Егер Құдай сені шебер етіп жаратпаса, онда Ол саған, мысалы, құрастырушы бол деп айтпайды. Мүмкін, Ол саған пианинода немесе скрипкада тамаша ойнау қабілетін берген болар, онда сен белгілі музыкант бола аласың. Немесе, Ол саған дәрігер немесе жазушы болуға дарын берген шығар. Мүмкін, сен дәрігер емес, электрик болуды қатты аңсайтын шығарсың, осылайша, Құдай сені дәрігер жасағысы келмейтінін өз тілегің арқылы білдіреді.

Әр түрлі мамандықтарды көз алдыңа елестетіп, олардың қайсысы өзіңе көбірек ұнайтынын ойлау керек. Өскен кезінде, сені белгілі бір мамандық бәрінен де артық қызықтыратын болады. Егер

сұрайтын болсаң, Құдай сенің мамандықты дұрыс немесе бұрыс таңдағаныңды көрсетіп береді.

Кейбір ұлдар мен қыздар өскенде өздерінің кім болатынын кішкентай кездерінен біледі, ал екіншілері мұндай шешімге мектепті аяқтаған кездерінде келеді. Кейде, Құдай біздің кім болатынымызды алдын ала білдірмей, ержеткенімізді күтеді. Уақыты келгенде, Ол мұны бізге көрсетеді, тек Оған үміт арту керек!

**Оқу үшін:** 1Қорынт. 12:12–31

**Сұрақтар:** Біздің мамандық таңдауымызға Құдай қалай көмектеседі?

Егер біз Одан ақыл-кеңес сұрасақ, Ол біздің теріс әрекет жасауымызға жол бере ме?

Құдай бұл сұрағымызға біздің бала кезімізде әрқашан жауап бере ме?

**Мінәжат:** Иеміз Иса, маған белгілі бір тапсырма дайындап қойғаныңды білемін және соны Сенің құрметің үшін орындауға дайынмын. Есейген кезімде, менің өмірдегі орнымды көрсетуінді өтінемін. Уақыты келгенде, маған жолымды көрсететінің сенемін. Амин.



#### 44. Құдаймен сөйлесуге кімнің құқы бар?

Егер сен астанада болып, аяқ астынан мемлекет басшысымен сөйлескің келсе, онымен сөйлесе алар ма едің? Әрине, жоқ! Саған бұл үшін айрықша рұқсат керек, өйткені өзімен сөйлескісі келген адамның бәрімен кездесуге оның уақыты жоқ. Мемлекет басшысының алдында болу – ерекше құрмет: оған әркімнің қолы жете бермейді.

Құдай мемлекет басшысынан әлдеқайда жоғары, егер бұлай ойлайтын болсақ, Онымен сөйлесуге ешкімнің құқы жоқ болып шығар еді. Бірақ, таңқаларлығы сол, біз қашан барсақ та, Ол қуанышты болады! Ол бізді әрқашан шақырады және кез келген уақытта қабылдайды.

Жаратушыңмен кездескен шынында да қызық болар еді ғой, солай емес пе? Бәрін Білушімен әңгімелесудің жанға жағымды болары сөзсіз. Мұндай шақыру алсаң, әрине, сен қатты толқыр едің. Құдай сені шақырады. Тіршіліктің барлығын Жаратқан Ол, сенің өміріңді де Өз қолына алып, оны басқарғысы келеді. Сені қабылдап, тыңдауға Оның әрқашан да уақыты бар.

Сондықтан сен Онымен кездесе аласың! Егер кездесуді қаласаң, онда көзіңді жұм да, басыңды иіп, Құдайдың өзіңді қаншалықты сүйетіні туралы ойла! Оған ойыңдағының бәрін айтып бер! Алдымен, Оның өзіңе деген мейірімі үшін, содан соң өзіңнің күнәң үшін өлген Иса Мәсіх үшін алғыс айт. Жылы киімдерің үшін, ата-анаң мен достарың үшін алғысыңды білдір. Оған өзіңнің мектепке бара

алатының үшін алғысыңды айт, кейбір елдердегі балалардың мұндай мүмкіндіктері жоқ.

Егер Оған айтатын өтінішің болса, алаңдамай айта беруіңе болады. Оған деген тілектерің мен өтінішің болса, Құдай бұған тек қуанады.

Құдай сені ести ме? Иә. Ол сенің қасыңда және сенің не айтайын дегеніңді, қандай ойың бар екенін біледі. Тіпті, сен өзіңнің қалағаныңды естіртіп айтпай-ақ қойсаң да болады: Құдай сенің жүрегіңде болып жатқанның бәрін де біледі.

Құдай сенің Өзіне келіп, әңгімелескеніңді жақсы көреді. Өйткені, сен Оның баласысың! Ол сенің Досың әрі Әкең! Сонымен, Оған өзіңнің бар мұқтаждықтыраңды айтып бер және Оның зор сүйіспеншілігі үшін алғысыңды білдір!

**Оқу үшін:** Евр. 4:16

**Сұрақтар:** Сен мемлекет басшысымен кез келген уақытта сөйлесе аласың ба? Неліктен Құдайдың кез келген басшыдан үлкен екенін түсіндір? Біз Құдаймен қаншалықты жиі сөйлесе аламыз? Неліктен? Өзіңнің Құдайға айтуың қажетті бірнеше нәрсені ата.

**Мінәжат:** Көктегі Әкеміз! Өзіңе кез келген уақытта келіп, мұқтаждықтырамыңды айта алатыным үшін алғыс айтамын. Мені мінәжат етуге үйрет және Өзіңнің ұлылығың мен мейірімділігіңді ешқашан да ұмытпауыма көмектес. Саған бәрі үшін алғыс айтамын. Аумин.

## 45. Өтірік

Құдайдың жеккөреде алатыны сені таңдандырмай ма? Әдетте біз, Құдай – сүйіспеншіліктің Құдайы деп білеміз. Ол рас. Бірақ, Ол кейбір нәрселерді жек көреді, мәселен: өтірік! Сондықтан, біздің өтірік айтудан бас тартқанымыз жөн.

Құдай Өзінің балаларының ізгілікті болғанын және олардың сөздері сенім артуға лайықты болып, айтқан сөздерінде тұрғанын қалайды. Мысалы, егер олар құпияны ашпауға уәде берсе, онда қанша сұраса да ол құпияны айтпауға тиіс.

Бірақ, тек қана шындықты айтамыз деп, кей кездері қиын жағдайларға тап болып жүрмейміз бе? Ондай да болады! Егер сен бір жаман қылық жасап, оны мойындасаң, онда сені жазалауы мүмкін. Бірақ, өтірік айтқаннан гөрі, әділ жаза алған жақсы. Егер күнәнді мойындаудың орнына өтірік айтатын болсаң, онда сен екі есе қателік жасайсың. Сондықтан Құдай сені екі күнәң үшін жазалауға мәжбүр болады. Өйткенше, шынықты айтып, ата-анаңнан ғана жаза тартқаның артық.

Шындықты ғана айтқанды ұнататын қыздар мен балалар сенім артуға тұрарлық адамдар болып өседі. Оларға сенім артуға болатындықтан, ондай адамдар жауапты қызметтерге қойылады.

Бірақ, кейде біз өтірік айтсақ, мақсатымызға тезірек жететіндей болып көреміз. Бұл – мүлде олай емес. Біз Құдайға сенім артуымыз керек. Егер адал болсақ, Ол бізге көмектеседі.



**Оқу үшін:** Ефес 4:25; Қолос. 3:9; Жохан 8:44

**Сұрақтар:** Балалар өтірік айтқанда, кім қуанады?

Кейде, адамдар өтірік айту арқылы көптеген жетістіктерге жетеді және оны ешкім сезбей қалады, яғни, кейде өтірік айтқан да дұрыс шығар? Әлде, олай емес пе? Неліктен?

Егер өтірік айтсақ, Құдай бізді кешіре ме? Өтірік айтқанымызды байқасақ, біздің не істеуіміз керек?

**Мінәжат:** Жаратушы Ие, әрқашан менің қателіктерімді көрсетіп отыратының үшін алғыс айтамын. Мені кешір және қанша қиын болса да, әрқашан шындықты айтуыма көмектес. Амин.

## 46. Барлық тіршілік атаулыны жаратқан кім?

Сенің балшықтан немесе құмнан бір нәрсе жасаған кезің болды ма? Одан кәдімгі үй немесе жануарлар жасай алсаң, өте қызықты болады ғой, солай емес пе? Ал сен балшықтан тірі ит жасауға талпынып көрдің бе? Әрине, оныңнан ештеңе шықпайды. Тірі нәрсені тек Құдай ғана жасай алады. Ешбір адам ешқашан тіршілік иесін жасай алған емес. Ол тек Құдайдың ғана қолынан келеді.

Тіршілік қалай пайда болды? Алғашқы ит қайдан шықты? Жер қалай пайда болды? Киелі кітап мұны

өте айқын түсіндіреді: оның бәрін Құдай біз үшін жаратты. Біз мұны тек Құдай ғана істей алатынын білеміз.

Бірақ, әлемді жаратқан Құдай емес, тіпті Құдай жоқ деп есептейтін адамдар да бар. Олар миллиондаған жылдар бұрын балшықтың бір кесегі өздігінен дамып, тіршілік ете бастады деп ойлайды. Бұлай ойлау – барып тұрған ақымақтық! Бұл адамдар өмірдің қалай басталғанын білмейді, сөйте тұра, Құдай жоқ деп сендіруге тырысады.

Киелі кітап: Құдай бүкіл әлемді жаратып болған соң, адамды жаратып, оның мұрнына тіршілік лебін үрледі дейді. Мұндай өмірді тек Құдай ғана бере алады.

Теңіз жағасында Айдар мен Болат деген екі дос серуендеп жүрді.

– Меніңше, бұл әлемді Құдай жаратқанын немесе олай емес екенін біз ешқашан біле алмаймыз, – деді Айдар.

Кенет, олар құмнан адамның аяғының ізін байқады.

– Бұл жермен таңертең біреу жүріпті, – деді Айдар.

– Солай ма? Сен бұған сенімдісің бе?

– Өзің де көріп тұрсың ғой! Мұнда біреудің ізі қалыпты, яғни, бұл жермен біреу жүрген.

– Көрдің бе! – деді Болат. – Әлемді Құдай жаратты деп дәл осындай сеніммен айтуға болады, өйткені, ағаштар мен гүлдер, күн мен жаңбыр, жалпы табиғат Оның ізі болып табылады, олар Құдайдың – Жаратушы екенін білдіреді.

**Оқу үшін:** Жар. баст. 1:1–23

**Сұрақтар:** Қандай да бір адам тірі нәрсе жаратып көрді ме?

Аспандағы жұлдыздар қалай пайда болды?

Неліктен кейбір адамдар өздерін Құдай жаратқанын мойындағылары келмейді?

**Мінәжат:** Көктегі Әкеміз, бүкіл әлемді жаратып, бізге өмір сыйлағаның үшін ризамын. Бір күні мені Өзіңе алып кетіп, сонда Сенімен мәңгі бірге болатыным үшін алғыс айтамын. Осының бәрін мүмкін еткен Иса Мәсіх үшін де алғыс айтамын. Амин.



## Мазмұны

Бір ғана Құдай бар .....	5
Құдай деген кім? .....	6
Құдай қайдан пайда болған? .....	8
Егер Құдайды көре алмасақ, Оның бар екеніне қалай сенеміз? .....	10
Құдай Әке, Құдай Ұл және Киелі Рух Құдай .....	12
Құдай адамды не үшін жаратты? .....	14
Ұлы Жаратушы туралы көбірек біле түсейік .....	16
Періштелер .....	17
Шайтан деген кім? .....	20
Адам ата мен Хауа ананың жаратылуы .....	22
Бұл әлемге күнә қалай енді? .....	23
Күнәдан Құтқарушыны жіберу – Құдай жоспары .....	25
Біздің мейірімді Бақташымыз .....	28
Егер Исаға: «Менің жеке Құтқарушым бола гөр», деп өтінсек не болады? .....	29
Иса мені не үшін құтқарды? .....	31
Егер мен жақсы болуға тырыссам, Иса мені құтқара ма? .....	32
Патшаның балалары .....	34
Дүниеге келерден бұрын Иса қайда болды? .....	36
Иса-Сәбидің өзге балалардан қандай айырмашылығы болды? .....	37
Иса жасаған кереметтер .....	39
Иса Мәсіхтің өлуі .....	42
Иса Мәсіхтің қайта тірілуі .....	43

Иса Өзінің Әкесіне қайтып оралды .....	47
Иса тағы да келеді .....	48
Киелі Рух .....	50
Мәсіхшілердің теріс қылық жасауға құқы бар ма? .....	52
Сенің жүрегіңнің тағында кім отыр? .....	53
Сенің жүрегіңнің тағында әрқашан патша болуы керек? .....	55
Жеміс беру .....	57
Адамның Құдайды сүйетінін қалай білуге болады? .....	59
Құдайдың балалары күнә жасаса не болады?.....	61
Неге біз кейде жазалануымыз керек? .....	62
Құдайдың хаты .....	64
Киелі кітапта жазылғандардың шындық екенін қайдан білесің? .....	66
Егер біз Киелі кітапты оқымасақ, не болады? .....	68
Құдай менен нені қалайды? .....	70
Неліктен мәсіхшілер әрдайым бірлікте болмайды?.....	72
Кешіру деген нені білдіреді?.....	75
Сенің сыйлығың .....	76
Тәңір күні .....	78
Сен Құдаймен татусың ба? .....	80
Құдайға құлшылық ету туралы .....	81
Ержеткенде кім болғың келеді? .....	83
Құдаймен сөйлесуге кімнің құқы бар? .....	85
Өтірік .....	87
Барлық тіршілік атаулыны кім жаратты? .....	88

Иса Өзінің Әкесіне ұялтып жүргені	47
Иса тағы да қалада	49
Қиын Рух	51
Мәңгілік жерге қайтқан	52
Сенін жүрегіңнен тәтті тартқаным бар ма?	53
Сенін жүрегіңнен тартқаным бар ма?	55
Жайық бөрі	57
Адамның құлағы	58

Осы кітап жайлы ой-пікіріңіз немесе сұрақтарыңыз болса, мына мекен-жайға хабарласыңыз:

050031 Алматы

п/ж 68

«ШЫҒЫС СӘУЛЕСІ»

liokaz@pactec.kz

Commercom@topmail.kz

www.shsaulesi.at.ua

Болмайды?	72
Көшіру деген не ені білдіреді?	75
Сөйіп ісбилдім	76
Танер сүй	78
Сен құлағымнан татусым ба?	80
Қалада құлағымнан тату елден	81
Ерлікпен не болды қалада?	83
Құлағымнан тату	85
Бәрі	87
Барлық ішкі	88

"Веретельный"  
баспаханасында басылды.

Есік қаласы, Бөлек,  
Заводская көшесі, 7.

Таралымы – 5000 дана.